

2. D. B. V.

De

# JURE BELL

CONSENSU MAGNIFICI JCTO-  
RUM ORDINIS,

PRÆSIDE

VIRO MAGNifico, NOBILISSIMO, EX-  
CELLENTISSIMO,

DN. CASPARO ZIEGLERO  
J. U. D. ET ANTECESSORE IN HAC  
ACADEMIA FAMIGERATISSIMO SERENISS  
ELECT. SAXON. CONSILIARIO, FACULTATIS  
JURID. ORDINARIO, CURIÆ PROVINC. ET  
CONSISTORII ECCLESIAST. ASSESSORE  
GRAVISSIMO.

DN. PATRONO AC PROMOTORE SUO  
DE VENERANDO.

PUBLICE DISPUTABIT.

FRIDERICUS ZICKLER/  
HAYNA-MISNICUS

IN AUDITORIO JCTORUM A. D. XXVIII. APRILIS



WITTE NBERGÆ,

Typis MATTHÆI HENCKELII

ANNO M. DC. LXVI.

# JUR E BELL

CONSEIL MUNICIPAL

REUNION ORDINAIRE

LE 15 MARS 1900

LE MAIRE, M. L. BELL

PRESENTE

M. CASTARO XIRO

LE D. ET ANTICISSORE IN H.

ACQUA FAMILIARE

PIETANO, CONSIGLIO, FACILITA

QUO ORDE ALIO, CUIE, FLOREN

CONSIGLIO FAMILIARE, ASSOCI

GRAVIA

LE 15 MARS 1900

LE 15 MARS 1900

LE 15 MARS 1900

LE 15 MARS 1900

LE 15 MARS 1900

LE 15 MARS 1900

LE 15 MARS 1900

LE 15 MARS 1900

LE 15 MARS 1900

LE 15 MARS 1900

LE 15 MARS 1900



# Adesto bone JESU!

I.



Va de legatis diximus hactenus, ple-  
 raque omnia ad jus mittendi pertinent, post-  
 quam de eo solo agere nobis constitutum  
 fuit. Ex finibus autem, propter quos legatio-  
 nes decernuntur, exserunt sese nonnulli, qui  
 singularia majestatis jura constituunt, quique  
 propterea in censum exercitationum nostra-  
 rum veniunt. Non enim una est legationum conditio. Aliquæ sus-  
 ciipiuntur ex officio, aliquæ propter negocium, aliquæ honoris  
 gratiâ. Legatio propter officium est, ad quam quis obligatur, ut est  
 Legatio Hispaniarum Regis ad Pontificem recens creatum, ratio-  
 ne regnorum Siciliæ & Neapolis. Legatio propter negocium est,  
 quæ ad matrimonium contrahendum vel auxilium petendum, fœ-  
 dus ineundum, & ejusmodi alia suscipitur. Honoris causa lega-  
 tio decernitur ad gratulandum vel condolendum. Ant. Perez. *Cod.  
 de legat. n. 2.* Ubi obiter moneo, legationem ex officio plerumque de-  
 beri propter vasallagium, nec proinde veræ legationis nomine ve-  
 nire, quod scilicet non ut à Principe, sed ut à vasallo mittatur. Le-  
 gatio autem propter negocium plurima complectitur, quemad-  
 modum ipsa quoque negocia varia sunt. Præcipua sunt illa, quæ non  
 nisi Principi conveniunt, ut bellum indicere, inducias facere, fœ-  
 dus inire, pacem condere. Et hinc igitur totidem jura majestatis se  
 exhibent, quæ considerata nunc sunt paulò plenius.

II. Bella ex jure gentium introducta esse dicit Hermoge-  
 nianus Jctus in *l. 5. ff. de just. & jur.* de cujus mente tamen adhuc  
 multum disceptant Interpretes. Communiter præsupponunt, etiam  
 dominiorum distinctionem jure gentium introductam esse, cum  
 eodem Hermogeniano *d. l.* post eam distinctionem malitiam ho-  
 minum & habendi libidinem magis magisque excrevisse, insecuta

deinceps fuisse bella, atq; sic bellorum jura introducta, eadem scilicet necessitate, qua primum dominia fuerint distincta. Dicunt igitur, bella inventa esse non dispositivè, sed causativè & occasionaliter, quia jus gentium non statuit bella, sed ex quo distincta fuerint dominia rerum, insurrexisse etiam bella, uti post Portium loquitur Fernandus Vasquius *l. 1. contr. c. 9. n. 5.* ubi deinceps cum Philosophis contendit, felicem fore civitatem, in qua meum & tuum non audiatur, præsertim cum dominium ex quodam fastu & libidine dominandi ortum habeat.

III. Etsi autem non dissitear, plurimum facere ad bella excitanda dominiorum distinctionem, cum ista hominis corrupti naturalis sit indoles, ut aliena appetat, & suis nunquam contentus vivat bonis; tria tamen circa sententiam eam explicandam assumuntur Doctorum placita, de quibus dubitare adhuc licet non sine ratione. *Primum* est, fuisse ab initio quoad usum communia omnia, proprietatem fuisse omnino nullam, atq; eo tempore vixisse homines vitam omnium optimam & beatissimam. *Secundum*, proprietatem rerum coepisse demum multiplicato genere humano, postquam scilicet in gentes istud excrevit. *Tertium*, cum demum etiam bella exorta esse; cum nec aliter juri gentium attribui queant, nisi præsupponas gentes, quæ adinvicem bella gerere possint.

IV. Priora duo his verbis exponit Hugo Donellus *comment. lib. 1. cap. 7.* Fuit in initiis hujus mundi tempus, cum ad tuendam vitam nihil dominis aut rerum distinctione opus esset. Cum enim duo homines primò conditi essent à DEO, ac diu multo post pauci fuissent, tantum fuit vacui in hoc orbe, & in rebus conditis, tanta utilium & bonarum rerum ubiq; affluentia, ut singuli homines de communi sumere possent, quantum vellent, sine alterius injuriâ & offensione. Ac postquam terra multitudo hominum frequentari cepit, recta ratio usu & experientia confirmata docuit, aut diu stare non posse genus humanum, aut in iis quæ colerentur suum cuiq; constituendum, quod quisq; privatim sibi coleret, quoque aliis sine voluntate domini pervenire non liceret. Communionem enim manente alterutrum futurum erat, aut ut terra propter quorundam desidiam & cessationem ab aliis quoque negligereetur, ac neglectu inculta jaceret, aut ut quibusdam colentibus & laborantibus alii qui nihil attigissent, in partem



commodorum venirent, & alienis laboribus sine ullo suo damno aut periculo fruerentur. - - Eventurum hoc quoque, ut qui ex parte coluissent, si essent cupidi & potentes, facile majorem partem ad se avocarent, imbecilliores egerent & opprimerentur. - - Quapropter post illam hominum frequentiam fuit hoc primum recte rationis & judicii opus, & lex inter homines, ut esset aliquid suum cujusq;, quod, ut dixi, ut suo labore quisq; coleret ac procuraret, ita caveret sibi, ne in id alius quisquam posset invadere sine injuria. Hinc primum dominia, hinc rerum & dominiorum distinctio, &c. Similia habent Doctores passim, sed quæ referre hic tædiosum foret, & planè super vacuum. Loquuntur autem ita non Jcti tantùm, sed Philosophi etiam, & Theologi Moralistæ complures, quorum omnium communis hæc est assertio, divisione & occupatione primum natam esse rerum proprietatem, & quidem ita aucto genere humano, ut communio retineri amplius non posset, ante istud tempus nec meum, nec tuum fuisse, sed communia omnia.

V. Ego verò repugnare ista puto ipsissimis verbis Scripturæ sacræ, quæ dominium rerum omnium & proprietatem illicò post creationem homini à DEO concessam discretè testatur. Ita enim DEUS ad hominem *Genesi* 1, 28. *Crescite & multiplicamini, & replete terram, & subjicite eam, & dominamini piscibus maris & volatilibus celi & universis animantibus, quæ moventur super terram.* REplete, inquit, non solum generatione & habitatione, sed cum primis imperio, cultu & usu: Verbo SUBJICITE non modò potestas hominis, sed & terræ in obediendo promptitudo significatur. Georg. Zezmahn. *de imag. DEI cap. 8. art. 8.* Subjiciendi autem istam potestatem dominium præsupponere & innuere patet ex *eod. cap. Genesi* 1, 26. ubi dicitur: *& præsit* (h. e. & dominetur, uti plerique explicant. Vid. Junius & Tremellius, Lucas Osiander, Sebastianus Castalio, Cornelius à Lapide & alii) *universa terra.* DEUS igitur, cum hominem creare statuisset, simul eum omnium rerum dominum facere decrevit; & cum hominem jam creasset, ei dominium istud actu ipso contulit, per quod scilicet factus fuit dominus universæ terræ. Istudq; dominium primis duobus hominibus ita in solidum concessit, ut si præter eos fuisset adhuc alius, nihil quicquam de dominio isto citra injuriam vindicare sibi potuisset.

VI. Agnoscunt id hodiè omnes illi, qui inter juris prudentes philosophari didicerunt; in explicatione tamen plurimi eorum ejusmodi aliquid addunt, quod à nobis probari nequit. Aliqui enim, inter quos Hugo de Roy *lib. 1. de eo, quod justum est, tit. 5.* non obstante isto dominio, nihilominus communionem adserunt, latissimum scilicet fuisse terrarum campum, copiosissimam omnium rerum affluentiam, exiguum autem hominum numerum, nullam igitur extitisse necessitatem, quæ hominem ad discernenda rerum dominia impelleret: Unumquemque jure proprio ac merito naturali ad suos usus occupasse, quæcumque communis natura ad vitam sustentandam produceret: habere se mundum hunc instar theatri, in quo, licet commune istud sit, rectè tamen dicatur, eum locum ejus esse, quem quisque præoccupaverit: vulgatum istud dogma, jure naturali omnia esse communia, ita accipiendum esse, videlicet, omnia in creatione & naturali ortu primævoque statu, huic illivè individo distincta, & propria non esse, sed pariter ac communiter omnibus hominibus. & quæ sunt alia. At profectò, qui ita sentiunt, non satis attentè considerant, ab initio, quo donatio hujus universitatis contigit, non fuisse plures homines duobus; quomodo igitur huic illivè individo distinctio & assignatio certæ partis fieri potuisset? Audito autem genere humano, cœperunt sine dubio, qui nati ex illis erant, uti domestici, & ejusdem familiæ liberi, communi mensâ frui, & iisdem frugibus, quæ parentibus in escam datæ erant, unâ cum illis vesci & nutrirî; sed quàm parùm ista communio observata fuerit, distinctum primorum fratrum vitæ genus ostendit *Genes. IV, 2.* Nec potuerunt tamen primi isti fratres, invito Adamo parente, vero rerum omnium domino, quicquam seorsim possidere, aut occupare. uti mox dicam.

VII. Alii dominium quidem à DEO primo homini concessum largiuntur, de possessione tamen adhuc tum disputant, quando ea cœperit. Dicunt enim, dominium istud esse tantum potentiale, idque consistere in potestate occupandi & possidendi, nec aliud esse quàm dominium in actu primo, per quod in possessionem, & à possessione in dominium, quod est actu secundo, venit. Ex quo deinceps conficiunt, terram hanc universam nunquam ab uno homine possessam fuisse. Ego verò pace eorum simpliciter assero, Adamum per donationem ejusmodi & dominium universæ

terra actuale, & possessionem ejusdem actualem simul nactum fuisse. Non enim necesse est corpore & tactu adprehendere semper possessionem, sed etiam oculis ea & affectu adqvi-ri potest, quemadmodum columnæ, quæ propter magnitudinem ponderis moveri non possunt, pro traditis habentur, si in re præsentî consenserint contrahentes *l. 1. §. 21. ff. de acq. vel amitt. poss.* Ita si vicinum mihi fundum mercator venditor in meâ turre demonstraret, vacuamque se possessionem tradere dicat, non minùs possidere cœpi, quàm si pedem finibus intulissem, *l. 18. §. 2. ff. eod.* Quod si jam consideres, DEUM ter opt. Max. non eminùs ostendisse homini hunc terrarum Orbem, quod tamen sufficere potuisset ad traditionem & adquisitionem possessionis, sed in re præsentî donationem perfecisse, & idèd eum in hunc mundum introduxisse, ut dominum eum & possessorem faceret universi terrarum Orbis, fateberis tandem, non aliter fieri potuisse translationem possessionis. Nec enim transferendæ possessionis rerum immobilium modus occurrit magis naturalis, quàm si quis in fundum ipsum introducatur, & animo sibi habendi eum occupet. Dicis, obstare magnitudinem & tantùm non infinitum hujus universi tractum, ut impossibile videatur, occupari istud posse ab uno aliquo homine uno adprehensionis actu. Ego verò nihil adhuc moveor, ut diversum quid sentiam. Ad possessionem enim adipiscendam sufficit pedem finibus intulisse *d. l. 18. §. 2. ff. de acq. vel am. poss.* qui fines plerumque extremam oram conficiunt; Necesse igitur non est, ut, qui fundum possidere velit, omnes glebas circumambulet, sed sufficit quamlibet partem ejus fundi introire, dum mente & cogitatione hæc sit, uti totum fundum usque ad terminum velit possidere, *l. 3. §. 1. ff. de acq. vel am. poss.* Atqui DEUS ita donavit primo homini orbem hunc terrarum, ut quantus quantus esset, posthac animo domini ab eo possideretur. Nihil igitur restat, nisi ut dicamus, unà cum dominio ipsam etiam possessionem totius hujus universi translatam fuisse titulo donationis in Adamum.

IIX. Sic igitur ostendimus, proprietatem rerum fuisse, antequam usus communis in familiâ inciperet. Iste autem usus sine dubio fiebat consentiente & volente Adamo. Quemadmodum enim unusquisque paterfamilias liberis suis & universæ familiæ a-



limenta debet; ita etiam Adamum liberis suis, qui in dominio rerum successuri erant, dare oportuit ea, quæ vel necessaria vel utilia videri poterant. Quod si quis eorum proprii aliquid habuit, uti Caino suos fuisse agros, Abeli suas oves memorat scriptura *Genes. IV, 2*, non aliunde id habere potuit, quam ex voluntate Domini siue Patris, qui ista talia, ut Romanorum verbis loquar, in peculium concesserat, aut donaverat. Quin imò credibile est, Adamum maximam partem Orbis terrarum, quod ei utendo ipse unus cum familiâ non sufficeret, pro derelicto habuisse, atque adeò siue à liberis ejus siue ab nepotibus ex familiâ egressis certas portiones occupatas fuisse, quâ ratione ipsi quoque Domini rerum occupatarum effecti sunt §. 46. *Inst. de R. D.* Concurrit tamen etiam hîc voluntas Domini, qui partem istam Terræ suam amplius noluit, eamque animo non habendi deseruit.

IX. Mortuo Adamo alius sese exerebat modus domini adipiscendi. Ratio enim naturalis, quasi lex quædam tacita ejus hereditatem liberis addicebat, velut ad debitam successionem, eos vocando, *l. 7. ff. de bon. damnat.* Omnes igitur ejus liberi, quotquot ille reliquerat, domini fiebant rerum hereditariarum, sed quia plures erant, dominiûm juris intellectu, non divisione corporis obtinebant, *l. 66. §. 2. ff. de leg. 2.* Incidebant enim illi in communionem, quæ terram hanc patri donatam omnibus communem faciebat, non singulis totam, sed pro partibus utique indivisis, ut intellectu magis partes haberent, quam corpore. *l. 5. ff. de stip. serv.* Habebat scilicet & acquirebat unusquisque partem, sed quæ non continebatur regione certâ, verum per totum fundum fusa erat, ita ut quælibet gleba deinceps esset Sethi, quælibet etiam Caini, nec vel pulvisculum esset, in quo non esset communio pro indiviso, quemadmodum ita etiam in quantitate nummorum communium singula corpora communia dicuntur *l. 13. ff. de R. C.*

X. Et hæc quidem ratione inducta fuit quædam rerum communio, sed quæ diversa est ab eâ, quam jactant Scriptores. Nec dubito, fuisse jam tùm vivente Adamo plurima talia, quæ ipse pro derelicto habuit, ab liberis ejus occupata, quæ propterea in hereditatem non erant connumeranda, sed dominis suis propria manebant. Fuerunt sine dubio etiam alia itidem pro derelicto habita, nondum tamen à quoquam occupata, quæ similiter ad heredita-



tem non pertinebant, quod ea omittentis esse desiissent *l. 2. ff. pro derelicta*. Quin & ipsam illam communionem non adeò diu durasse arbitror, tùm quod assueti jam essent liberi Adami peculiare, aliquid seorsim habere, tùm quod communio plerumque discordias & lites excitare solèat, quibus declinandis unicum familiæ herciscundæ remedium facere potest, tùm denique quod post diluvium reviviscente rerum naturâ similem divisionem fecerit. Noachus, qui inter filios suos terrarum orbem ita distribuisse legitur, ut Semo Asiam, Chamo Africam, Japeto Europam & aliquam Asiæ partem colendam & rectè gubernandam assignaret. Vid. Joseph. *lib. 1. antiqu. jud. cap. 6. & 7.* Jacob. Middendorp. *de Academ. lib. 1.*

XI. Noachi hujus temporibus alia inducta fuit communio, dum scilicet ille & tres filii ejus Semus, Chamus, & Japetus ex donatione Numinis divini, domini pro indiviso universi terrarum orbis facti sunt, *Genes. IX, 2.* Sed enim inter ejusdem familiæ homines facilius consistere potuit communio, præsertim si quam proximè patrem familias attingant, uti fuerunt tùm Noachidæ, quod multa sustineantur ex reverentiâ, quæ aliàs facillè litigia parere possent. Nec tamen putandum est, nihil omninò tùm fuisse, privati & unum cunctis patrimonium fuisse, sed imò credibile est, Adamitarum primorum exemplo huic sua sata, illi sua pecora & compascua fuisse. Credibile etiam est, Noacho ut familiæ patri communem administrationem & dispensationem ab non invitis filiis relictam fuisse, cujus rei argumentum est, quod ipse deinceps distributionem privati cujusque domini fecerit, limites posuerit, & partes pro indiviso in partes pro diviso resolverit. Ipse etiam, si credendum Eusebio & Cedreno, divisionem illam testamento firmavit, atque moribundus illud in Semi filii primogeniti manus tradidit cunctosque simul monuit, ne quis eorum fratris fines invaderet, nec injuria alter alterum afficeret: quoniam inde, ut discordiarum atque bellorum intestinorum causa oriretur, foret necessum. Selden, *in mari claus. lib. 1. cap. 4.*

XII. Patet hinc, falsum esse, quod creditum tamdiu fuit, res omnes olim exclusâ penitus proprietate patuisse promiscuo usui, dominia autem divisione demum & occupatione esse exorta. Et tamen

tamen, quia passim ea res credita est, nec quisquam contradicere ausus fuit, vitio non erit vertendum Hermogeniano, quod l. 5. ff. de iust. & iur. dominiorum distinctionem ex jure gentium ortam dicit. Magis autem succensendum est pseudo Clementi cujus c. dilectissimis 12. qu. 1. hæc habentur verba: *Communis usus omnium, quæ sunt in hoc mundo omnibus esse hominibus debuit, sed per iniquitatem alius hoc dixit esse suum, & alius istud, & sic inter mortales facta est divisio.* Denique quidam Græcorum sapientissimus hac ita sciens esse communia debere, ait, amicorum esse communia omnia. In omnibus autem sine dubio sunt & conjuges & c. Hæreticum hoc est, & ipso Bellarmino de bon. op. l. 3. cap. 11, fatente, ab Nicolao Hæresiarchâ profectum, communes esse debere Uxores. Quod verò fingit, per iniquitatem demum, dominiorum distinctionem introductam esse, id nullâ planè nititur ratione, & ex superioribus convelli facile potest; quæquam non negem, propter iniquitatem hominum aliena semper cupientium incubare magis cœpisse unumquemque rei propriæ, & attentius eam sibi custodivisse, cum aliàs natas sibi fruges includere opus non haberet.

XIII. Quid ergo dicemus de eo, quod itidem creditum hætenus fuit cum Hermogeniano d. l. 5. ex jure gentium bella introducta fuisse? Hoc enim tertium est, quod negatum ivimus supra. Enimverò, cum nondum ingentes excrevisset genus humanum, & unicâ tantum eâque admodum tenui adhuc familiâ contineretur, jam tùm inter se bella meditabantur illi, & alter alterius odio inflammatus mortem intentabat, uti de Abele & Caino memorat Scriptura sacra. Et hinc igitur omnis repetenda est origo bellorum, ita ut ab initio singuli, postea familiæ, hinc civitates, & tandem integræ gentes se invicem persequi cœperint. Quod ipsum etiam quodammodo indicat vocabulum belli. Dictum est enim bellum ex voce duellum, sicuti alia etiam vocabula ita immutata sunt, ut duonus & bonus, duis & bis, duidens & bidens, duellona & bellona. Optimè Scaliger l. 3. Poet. 90. *Bellum dicitur, quia fuit ab initio duellum à duobus.* Nam licet multi sint milites, due tamen partes sunt & inter duos tantum primum bellum fuit. Add. Hug. Grot. l. 1. de iur. bell. & pac. c. 1. num. 2. Quandoquidem igitur, cum primum inter duos fratres bellum exardesceret, nullæ adhuc

tum integræ extiterunt gentes, facillè hinc patet, jure gentium introducta bella dici non posse. Nisi ergò cum Hugone Grotio *l. 1. cap. 2. num. 4.* Hermogenianum Jctum ita accipias, ut certam bellorum formam à jure gentium introductam fuisse dicas, quam formam quæ habeant bella, ea peculiares ex jure gentium effectus consequantur, causæ nihil erit, quin etiam hic ab communi sententiâ discessum faciendum existimem.

XIV. Placet tamen omninò sententia Grotii, eò, quod nomen belli in famosiore significatu non duello amplius tributum est, sed illi dissidio, quod inter adversos exercitûs habetur, imò verò illi tantum quandoq; quod publicum alias dicitur bellum. Ita enim sæpissimè nomen generis speciei, præsertim excellentiori, adhærescit, quomodo in jure nostro vocabulum actionis tantum illi tribuitur, quæ est in personam *l. 28. ff. de O. & A.* quomodo etiam cognationis vocabulum restrictum est ad eos, qui per fœminas junguntur, *§. 1. Inst. de legit. agnat. tutel.* & vocabulum adoptionis arrogationi, quam tamen generali significato complectitur, opponi cœpit. *§. 1. Inst. de adopt.* Hæc itaq; ratione bellum hodiè in sensu specifico non aliud est, quam quod inter diversas gentes agitur. Et quia nunquam ulla gens tam quietè possessione suâ uti potuit, ut non identidem vel à vicinis, vel à longius disitis lacesseretur, factum hinc est, ut gentes ferè omnes communi quasi consensu in leges quasdam convenerint, juxta quas bellum, si quod inter eas exortû fuerit, geri oporteret. Et hinc propter istas leges sive jura, quæ mero jure gentium nituntur, ipsum etiam bellum juris gentium esse non absurdè dicitur.

XV. Quibus ita præmissis, de belli jure, quantum nostrum feret institutum, quasi per compendium dispiciemus. Sed quia bellum hodiè nihil aliud est, quam status duorum pluriumve populorum armatâ vi se invicem insectantium, intelligi facillè potest, duellantium jura, leges, aut consuetudines recepras ad jus belli non pertinere, nisi forte bellum quod inter populos jam ardet, in singulare duorum pluriumve certamen de summâ rei dimicantium resolvatur. Id enim, uti factum à quamplurimis, historiarum nos docent monumenta, ita fieri nunquam debere prorsus nego, quod hac ratione ingens, quæ utriq; populo imminet, clades paucorum



sanguine expiatur. Vid. Hug. Grot. *de jur. bell. & pac. lib. 2. c. 23. num. 10.* Et si enim satius esset, quovis modo rem transigere, quam desperatum ejusmodi & sanguinolentum remedium eligere; si tamen pax aliter impetrari nequeat, & commodior atque clementior modus definiendi rem se non offerat, confugiendum erit ad id, quod haberi potest, quodque inter duo mala censetur minus perniciosum. Conf. Paul. Laymann. *theol. moral. lib. 3. tr. 3. part. 3. cap. 5. num. 3.* Istiusmodi tamen duellum pro privato haberi nequit, tum quod publicâ fiat autoritate, tum etiam quod publico nomine & pro integro populo.

XVI. Possê tamen etiam à privatis sine peccato suscipi singularem dimicationem, contendit Hugo Grotius *de jur. bell. & pac. lib. 2. cap. 1. num. 15.* primum, si invasor concedat alteri licentiam, dimicandi, alioqui eum occisurus sine dimicatione: deinde, si Rex aut Magistratus duos mortem meritos inter se committat; quod si fiat, illis quidem licere arripere spem salutis, jubentem tamen minus rectè suo officio fungi, cum satius fuisset, si unius supplicium sufficere videbatur, sorte eligi moriturum. Ita Grotius. Quod primum attinet, nititur istud defensione naturali, quæ invaso competit, ut maximè invadens nullam concesserit licentiam dimicandi. Sive ergo potestatem hanc dederit sive minus, poterit impetitus omnem vim à corpore, à capite, à vita sua propulsare, & aggressorem etiam, si aliter periculum evitare nequit, occidere. In secundo exemplo Princeps utrumque reum in alterutrum justitiæ ministrum decernit, ut justam mortis sententiam in ipsum exequatur, ei autem, quæ prævenierit, vita condonetur. Quod num deceat principem, merito dubitat Grotius, quod non minus in hunc, quam in illum animadverti ex justitiæ ratione oporteat; nec tamen magis consultum erit justitiæ, si ut vult Grotius, sorti res committatur. Et fortè nec sufficit Principi unius supplicium, cum certamine concesso mutuis ictibus uterque interfici possit. Id tamen non nego, posse utrumque delinquentem conditionem oblatam acceptare, & feriendo alterum executoris, excipiendo autem & propulsando defensoris partibus fungi.

XVII. Extra hos casus difficile erit monomachias defendere. Est enim provocatio & mutua ad duellum oblatio opus i. in-  
excu-



excusabilis audaciæ, quo sine necessitate homo seipsum, in discrimen vitæ & æternæ salutis conjicit, 2. intolerabilis feritatis, quatenus non in suam tantum, sed alterius etiam vitam aliquis cum rabie quâdam sævit, 3. extremæ injustitiæ, quatenus pro injuriâ interdum levissimâ & à Viro cordato non æstimandâ mortis exhibetur retributio, 4. immanis superbiæ, quatenus victor ex ruina hostis, imò verò proximi sui gloriam sibi quærit. 5. affectatæ inobedientiæ, quatenus quis ita magistratus sui auctoritatem spernit & sibi ipsi ius dicere præfractè annuitur. Tanta igitur vitiorum confluges cum in unico hoc delicto reperiatur, mirum est, non DEI, non principum legibus, non pœnis, non mansuetudine flecti posse homines, ut ex gladiatoria palæstra transeant aliquando in mores Christianos. Vid. quæ in hanc rem disputant Fernand. Vasquius, *lib. 1. contr. illustr. cap. 12. & cap. 49.* Franzkius *lib. 2. resolut. 23. & exercitat. 12. quæst. 6. in addit.*

XIIX. Quàm impii verò hîc sunt, & ab omni christianâ religione alieni inter Pontificios Moralistæ, qui tantum abest, ut CHRISTI exemplo mansuetudinem & patientiam inculcent, ut potius certò casu licita faciant duella. Ita enim Paulus Laymannus *Theol. moral. lib. 3. tr. 3. cap. 3. num. 3. si eo loco res sita sit, ut miles in exercitu, Vir equestris in aulâ regiâ, officio & dignitate, Ducis aut Principis favore ob ignavia suspicionem, excidere debeat, nisi identidem provocanti se sistat, non audeo damnare eum, qui mera defensionis gratiâ paruerit.* Alii adhuc longius progrediuntur, & methodo dirigendæ intentionis, uti vocant, invento verè diabolico, DEO & hominibus illudere non ducunt piaculo. Hac igitur arte etiam monomachias in genere licitorum ponunt, dum saltem animus abstrahatur à cupiditate vindictæ. Pone, inquit Petrus Hurtado, *hominem nobilem ab alio provocari ad duellum, qui si illud recusat, non censetur illud recusare propter tegem DEI, sed propter timiditatem, quia non benè audit de observatione legis, quia se faciliè projicit in alia peccata, vel certè alia ex causa censetur timidus, & ab aliis despicitur, apud quos semper erit inglorius, ex quo non levia damna & incommoda sequerentur.* Est igitur quæstio, *utrum in hoc casu possit provocatus exire in locum condictum, non cum absolutâ voluntate pugnandi, sed cum*

*conditionatâ, si à provocatore prius petatur injustè. Provocati autem absoluta voluntas, est tueri opinionem viri fortis & depellere infamiam timiditatis, quæ objecta per se sunt honesta, necessariâ viro nobili ad degendam vitam decorè inter suos, præcipuè militi, qui ab exercitu censetur gallina & non vir: media autem, quæ eligit ad hunc finem sunt indifferentia ad bonum & malum: nempe egredi in agrum & in eo deambulare, quæ media honestantur ab eo fine: hæc absolutè vult provocatus, pugnare autem non vult. Si ab alio petatur injustè, vult sub eâ conditione se inculpate tueri, si aliâ ratione commodè non possit: in hac occasione videtur provocatus minimè peccare, neque acceptare duellum: quia acceptatio duelli est voluntas deliberata seu absoluta, quâ homo iste caret. Euge verò, quid reliquum est, nisi ut exclamet Melicerta, perisse frontem de rebus: dum principes ad excindendum hoc cacoëthes omnem suam potentiam conferunt, eodem tempore omnem intellectus aciem eò conferunt Moralistæ, ut duella licita faciant & conservent. Quin eò tandem dilabuntur impudentissimi ardeliones, ut actorem, qui calumniæ causâ negocium facescit in iudicio, impunè sive per duellum, sive ex insidiis occidi posse statuunt. Ita enim se habent verba Sanctii in *Summ. l. 2, cap. 39, num. 7*. Melius alii dicunt, licere innocenti duellum acceptare & offerre ad vitam, honorem, & res familiares in notabili quantitate tuendas, quando constat, omninò injustè & per calumniam actorem procedere, & certum est, omninò fore ut hæc innocens amittat, nec aliud sibi evadendi remedium suppetat: atque optimè Bannes ait, licere innocenti in his casibus acceptare & offerre duellum; imò & non provocando ad duellum, occidere occultè auctorem illum calumniosum, cum hæc occisio sit vera defensio. Imò benè Navarr. num. 290. ait, teneri innocentem non acceptare duellum nec indicere, si potest occultè illum occidendo id vitæ, honoris, rerum familiarum periculum evadere: quippe sic proprium vitæ periculum in duello imminens vitabit, & peccatum auctoris offerentis vel acceptantis duellum. Profectò, si quæ est pietas inter homines, multum illa deteritur per argutias ejusmodi nefandas & propudiosâ commenta. Et tamen videri illi volunt, qui isthæc excogitant, totius Christianismi velut æstimatores & arbitri, digni, qui cum chartis suis cacatis perpetuis tenebris offundantur.*

XIX. Ut maximè autem accesserit iussus aut consensus Principis, non magis tamen hinc licita fieri arbitror duella. Fuit quidem jam olim tum apud Germanos, tum alias nationes receptum, ut lites tam publicas, quam privatas armis dirimerent, habitumque id pro optimo litium abbreviandarum remedio. Ventur. de Valent. *in Parthen. litigios. lib. 2. cap. 2.* Atque illæ tum monomachiae non invitis illis, qui summum in Rep. tenebant imperium, exercebantur, quin & legibus in eam rem latis sustinebantur, quod de Frontone Danorum Rege refert Saxo Gram. *in hist. Dan.* Nec desunt hodie, qui postliminiò quasi reversurum istud remedium vaticinantur, plurimi exoptant. At enim immanem illam & barbaram probandi & litem dirimendi consuetudinem meritò profligârunt Imperantes, & salutari judiciorum ordine constituto non armis amplius, sed legitimis probationibus rem expediri voluerunt. Dn. Tabor *de legis. arm. usu c. 2. n. 3.* Quibus cum potestas nulla sit contra jus divinum, & rationem rectam, bonosque mores dispensandi, nullo suo edicto, nullaque permissione efficere possunt, ut armis congregiantur, & periculoso duello de iustitiâ causæ disceptent litigantes. Et observatum est, graviter nonnunquam à DEO punitos fuisse Principes, qui pugnas ejusmodi privatas admiserunt. Franzk. *lib. 2. resolut. 23. n. 44.*

XX. De bellicâ autem monomachia fortè diversum statuumdum erit. Intelligo autem talem monomachiam, quando ex utroque exercitu hostili solus aliquis cum solo congreditur. Fieri enim haud rarò solet, ut prodeat aliquis ab exercitu hostium, & provocet, si quis singulari certamine secum experiri velit. Cum illo, quia hostis est, committi posse militem viribus suis confidentem, nullus dubito. Et imò fieri potest, ut absque tali provocatione, dum in castris juxta se morantur exercitus, in confiniis singuli in singulos incidant, ibi tum ego utrumque etiam absque consensu & praescriptu superioris alterum invadere, & occidere posse existimo. Quidni igitur adversus provocantem mittere liceat auctoritate principali, qui cum eo pugnam ineat? praesertim cum toti exercitui id conducere videatur, ne per Thraënicam suam jactantiam nimium confidere sibi incipiat hostis. Eodem jure censenda sunt praelia tumultuaria, quæ per integras turmas conficiuntur, & scaramusæ Schar-



mūsel vulgò appellantur, quæ si fiant propter bonum publicum, non minùs iusta sunt, quàm est ipsum bellum aut prælium, quantumlibet ingens aut atrox. *Fernand. Vafq. lib. 1. controu. cap. 49. n. 18.* Et solent ejusmodi velitationibus, præsertim si frequentiores sint, non vires tantùm, sed etiam animi succumbentium frangi, quos deinde facilius erit componere & pacis rogandæ cupidos reddere.

XXI. Sed hæc jam ad belli publici jura pertinent, de quibus nostra nunc præcipua est cura. Antequam autem ulterius pergamus, operæ pretium erit exactiùs definire, quid belli publici nomine intellectum velimus. Dicitur igitur bellum publicum nobis illud, quod geritur autore eo, qui summum tenet in Rep. imperium. Deficiente istâ autoritate, bellum pro privato est habendum. Contingere autem potest, ut ex unâ parte autoritas imperantis, ex alterâ nulla talis interveniat, numquid publicum, an privatum id diceretur bellum? Mixtum id dicit *Grotius lib. 1. de jur. bell. & pac. c. 3. n. 1.* Ego nec bellum quidem id esse dixerim, nisi pari autoritate congregiantur exercitus. Non enim in usu armorum tantùm & externâ vi consistit bellum, sed etiam & potissimum quidem in jure. Jus belli ergò quibus non competit, cum illis etiam non geritur bellum; perinde, uti *exercitatione anteced.* illis tantùm jus legationis competere diximus, qui summum tenent imperium. Hâc ratione ex Reip. suæ usu optimè hostes definivit *Ulpianus*, quòd sint, quibus bellum publicè populus Romanus decrevit, vel ipsi populo Romano. cæteri latrunculi vel prædones appellantur. & ideò, inquit porrò, qui à latronibus captus est, servus latronum non est, nec postliminium illi necessarium est. ab hostibus autem captus, utputa à Germanis & Parthis & servus est hostium & postliminio statum pristinum recuperat, *l. 24. ff. de captiv. & postlim.* Disertè hîc jus belli negat competere latronibus, uti etiam facit *Paulus in l. 10. §. 2. ff. eod.* non aliâ de causâ, quàm quod illi nullâ autoritate publicâ coëant. Ille igitur hostis est, qui habet Remp. curiam, ærarium, consensum & concordiam civium & rationem aliquam, si res ita tulerit, pacis & fœderis; reliqui, etiamsi exercitus habeant, & milites atq; Imperatores se ferant, non pro hostibus, sed pro latronibus & Spartacis sunt habendi, uti contra *Antonios*, veluti contra latrones, differit *Cicero Philipp. 4.* Fieri tamen potest, ut per adeptio-

nem



nem publicæ causæ ex latrone & latrocinio in ducem & in bellum evadatur, veluti quando quis à privato latrocinio ad patriæ causam tuendam se confert, quod exemplis confirmat Albericus Gentilis *de jur. bell. lib. 1. c. 4.*

XXII. Inter ipsos cives si arma capiantur, interesse videtur, num ita divisus sit populus in partes, ut dubium sit, ab utrâ parte stet jus imperii, dum utraq; majestatem affectat, an verò tale quid non contingat, sed aliunde nascantur dissensiones. Priore casu, quia progressa temporis gens una in duas gentes scindi potest, non erit absolum dicere, utramq; partem jura belli habere, & sic utrinque justum, hoc est, solenne censerî bellum. Posteriore casu belli jura locum non inveniunt. Quia enim illi, qui jura majestatis tenet, cum seditioso pugnandum est exercitu, & cum subditis suis, prævalere hic inter arma imperium, & ideo à Principe exercitum comparari, non ut pacem ab adversariis extorqueat, sed ut in ordinem cogat refractarios, & ad agnoscendum imperium suum vi adigat. Et huc pertinet, quod scribit Ulpianus *l. 21. §. 1. ff. de captiv. & postl. In civilibus dissensionibus, quamvis sæpe per eas Resp. ledatur, non tamen in exitium Reip. contenditur. qui in alterutras partes discedent, vice hostium non sunt eorum, inter quos jura captivitatum aut postliminiorum fuerint.*

XXIII. Sive autem adversus latrones, sive adversus subditos arma capiantur, neutrum jus belli valet, ne quidem ex parte capientis. Dum enim præsupponimus, jus belli ut locum habeat, ex utraq; parte pugnantium æqualitatem, faciliè hinc patet, in civilibus dissensionibus & persecutione latronum æqualitatem eam non inveniri. Ut maximè ergò Princeps juribus majestatis utatur, & exercitum cum potestate insolentissimâ & cum apparatu plusquam solenni mittat, non tamen utitur tum eâ majestate, quam erga parem ostentare debet & solet, sed majestaticum potius exercet imperium. Quemadmodum enim magistratus oppidanus in contumaces & refractarios cives, vi jurisdictionis, quam tenet, variè animadvertit, eosq; per apparitores & executores plures vel pauciores pro re natâ ad obedientiam cogit, bona etiam subditorum adversus fures & violentos invasores pro modo jurisdictionis;

defendit: haud aliter Princeps vi imperii, quod gerit, rebelles in ordinem cogit, & subditorum suorum bona ab invasione latronum secunda reddit. Quod autem in eam rem integrum nonnunquam & copiosum exercitum conscribere opus habet, id facit magnitudo periculi, & quod non una tantum civitas, sed integra quandoque provincia, aut saltem ipsius imperantis majestas, adversariorum libidini exposita sit, quibus ut capistrum injiciatur, tanto interdum opus est apparatu.

XXIV. Nescio tamen, utrum faciendum sit cum Grotio, qui *lib. 1. de jur. bell. & pac. cap. 3. §. 4.* scribit, si citra leges civiles res spectetur, videri omnem magistratum, sicut ad tuendam plebem sibi creditam, ita ad exercendam jurisdictionem, si vis occurrat, jus habere belligerendi; sed quia ex bello tota civitas in periculum venit, idem ferme omnium populorum legibus cautum esse, ne bellum geri possit, nisi auctore eo, qui summam in civitate potestatem habeat. Enimvero vis illa, quæ occurrere & exercitium jurisdictionis impedire potest, aut est externa, aut interna, h. e. aut extra civitatem, cui Magistratus præest, aut in ipsâ illâ sese exserit. Priore casu impedimentum contingit aut à privato aliquo, aut ab hoste publico. Cum illo ut bellum geratur, omnis ratio vetat, quippe qui coerceri nullo negotio potest, nisi id facit autoritate publicâ. tum enim, quia sub augustiore clypeo occultatur, vertenda erunt arma in illum, qui est ejus rei causa prima & præcipua, ut tamen ipsi etiam instrumento, h. e. illi, qui immediatè vim infert, fibula injiciatur. Cum hoc armis quidem transigere necesse est, sed quia per impedimentum Magistratui positum ipse ille petitur & contumeliâ afficitur, qui Magistratum constituit, ad illum potius spectat belli gerendi potestas, quàm ad magistratum, aut si per magistratum impedimentum removeri potest, non tamen id fieri debet sine præscitu & autoritate superioris, quippe cujus interest, rem benè & cū emolumento geri. Posteriore casu poterit magistratus ipse vi jurisdictionis, quam tenet, contumaces coercere habito eo ordine, quem præscribit Bart. Blarerus *ad l. diffam. cap. 11. n. 11.* Oldendorp. *class. 1. ad. 2. n. 8.* ita ut manu etiam militari uti possit, si aliter obtemperare subditus nolit *l. 68. ff. de R. V.* Hunc enim in finem Magistratus armatam manum apparitorum præstò habet, qui mun-

ris necessitate ad armorum gestationem adstringuntur. *Dn. Tabor de hoplophor. c. 3. n. 26.* Nego tamen hanc potestatem coincidere cum potestate belli gerendi, nisi belli vocabulum Grotius tam latè capiat, ut qualemcumq; vim armatam, etiam eam, quâ Magistratus in subditos utitur, includat, sed quo ipso in meras æquivocationes negotium desinit.

XXV. Nec magis verum est, quod ait Grotius, per leges civiles factum esse, ne bellum geri possit, nisi auctore eo, qui summam in civitate potestatem habet. Rectiùs, nî fallor, Augustinus apud Gratianum *c. quid culpatur 23. q. 1.* cujus ipse etiam meminit Grotius: *Ordo naturalis mortalium paci accommodatus hoc poscit, ut suscipiendi belli auctoritas atq; consilium penes Principes sit.* Ordo iste naturalis ex eo inprimis resultat, quod maximum Reip. turbandæ momentum in bello consistat, quodq; tota salus communis ab exitu belli pendeat. Et ex hoc capite jus belli tanti æstimat Bodinus, ut eo nullum ferè majus regale inveniri dicat, *lib. 1. de Rep.* At credo ego, regalia ista, quæ ad majestatem constituendam ab omnibus gentibus requiruntur, uti est jus belli gerendi, non demum ex civili jure provenire, sed altius repetendam esse eorum originem. Aliàs autem non dissimulo, etiam lege positivâ, aut consuetudine aliqua regalia constitui posse, de qua re dixi *exerc. 2. n. 22.* sed quæ tamen apud omnes gentes ita non observantur aut custodiuntur, & abesse idcirco possunt à Principe quâ tali. Belli autem jus idè abesse nequit, quia in eo non Reip. tantùm salus, sed ipsius etiam imperantis majestas periclitatur, sive hostes consideres, cum quibus pugnandum est, sive ipsas civium cohortes, quæ belli ingruentis colore ipsum faciliè imperantem impetere possint.

XXVI. Quæ cum ita sint, fortiore argumento concludimus, non licere subditis adversus Principem etiam pessimum & iniquissimum bellum movere, aut armis resistere. Et dolendum planè est, inventos nostro seculo viros eruditos, qui contra sacras literas, contra rectam rationem, contra piæ antiquitatis sententiam novo procuso dogmate inferioribus quibusdam potestatibus adversus summam arma induunt. Ajunt, magistratus (de his enim principaliter quæstio est, cum de privatis facilius admittant, eos adversus Principem insurgere non posse) in partem curarum



publicarum assumptos esse, potestatem igitur eis datam decernendi & disponendi ea, quæ ad publicam salutem faciunt; cumq; salus publica obtineri nequeat, sicubi in Tyrannum degeneret Princeps, dicunt, habere magistratus ita constitutos potestatem removendi talem Principem, aut manu armatâ cogendi, ut gubernaculis decedat. Sanè Petrus Apostolus docens parendum esse Regi, i. e. summæ potestati *ὡς ὑπαρχόντι*, præsidibus autem, id est, inferioribus potestatibus *ὡς δι' αὐτῶν πρὸς τοὺς πολίτας* tanquam misis ac ordinatis à summâ potestate, 1. *Petr. II, 13, 14.* manifestè ostendit, omne inferiorum potestatum jus à summarum potestatum imperio pendere, & ab eo emanare. Ut maximè igitur magistratus isti ratione inferiorum superiores sint, & Magistratus dicantur, summæ tamen potestatis ratione meri sunt privati & subditi. Uti enim in Logicis subalterna genera duplicem inferunt habitudinem, alteram quidem generis, quâ se habent erga subjectas species & ad illas referuntur, dum illarum genera dicuntur, alteram verò speciei, quâ se habent erga suprà posita genera, & quâ ad illa referuntur, ut dicantur eorum subijcibiles species, ita quidem, ut ratione summi generis semper sint species, & ne dicenda quidem sint genera: ita negare quidem non possumus, magistratus inferiores, uti vocantur, habere aliquam potestatem, & esse personas publicas, si considerentur ratione inferiorum sibi subjectorum; si verò cum summâ, cui subsunt, conferantur majestate, protinus omnis evanescit potestas, & in hujus respectu perinde se habent, ut alii privati. Majestas autem perinde ut genus generalissimum, ita summa est & dicitur, ut nulli alii subjici possit & debeat, sed reliquos magistratus omnes transcendat, adeoque se à potestate eorum liberet. Hinc Marcus Aurelius sapientissimus Imperator eleganter dixit, Magistratus de privatis, Principes de magistratibus, Deum autem de Principibus decernere ac judicare. Neq; aliter senserunt veteres Christiani, apud quos nulli Præsides, nulli legum duces contra impios, sævos, truculentos Imperatores armatâ manu quicquam moliti sunt, sed patientiæ gloriâ contenti etiam decimari se quandoq; passi sunt, nec aliam nisi dolendi, flendi, gemendi, orandi sibi sumperunt potestatem.

XXVII. Sed hæc tamen omnia intelligenda sunt de eo Principe



eipe, qui solus imperat, neque Ordinum decretis adstringitur, aut eos in partem maiestatis admittere tenetur. Quibus enim adstricta & circumcisa aliisque simul collata aut retenta est potestas, in illos, uti summum imperium non tenent, ita arma ex Optimatum tanquam superiorum sententiâ sumi iustis de causis possunt. Multi quippe Reges, etiam qui sanguinis jure succedunt, Reges sunt nomine magis, quam imperio, uti de Laconicis Regibus scripsit Æmilius Probus. Perpetuò autem hoc in nostris hisce exercitationibus observavimus, ut Principis vocabulo denotarem eum, qui maiestatem tenet, sive jam de Monarchiâ, sive de Aristocratiâ, sive de Politia disquisitione instituat, ita tamen, ut si de Monarchiâ questio fuerit, simplicem eam intelligamus, non mixtam, aut alio aliquo regimine temperatam. Hoc enim si factum fuerit, ipsa etiam jura maiestatis, quasi inter socios, divisa erunt, & sic ea ut exerceantur, plurium suffragia exigere necesse est.

XXVIII. Ut de potestate Magistratus circa arma capienda caput absolvam, potest interdum ita præsens esse periculum, ut tempus non ferat eum consuli, qui supremum in civitate jus habet. Ut ecce, aggreditur hostis aliquis externus civitatem, eamque obsidione cingit, idque tam præproperè, ut à Principe alibi degente nullum possit exquiri aut expectari mandatum. Hic verò necessitas exceptionem porriget, & poterit tùm magistratus cives suos etiam inconsulto Principe ad defensionem sui excitare, iisque arma induere. Quin imò, quæ ita à civibus suscipitur defensio, ex præsumptivâ voluntate Principis videtur fieri, quod malit civitatem quibuscunque modis salutem suam procurare, ut in fide retineatur, quam ab hostibus eripi & occupari. Et quanquam talis præsumptio nulla adesset, aut etiam de contrariâ Principis voluntate constaret, poterit tamen civitas ita sibi relicta & à Principe suo deserta nihilominus armis resistere, & vim hostilem pro viribus repellere: redit enim tùm ipsi talis potestas ex jure naturali simplici, quo unumquodque conservationem sui quovis modo procurandi potestatem habet.

XXIX. Extra hunc casum necessitatis, maiestatis crimen committit, qui injussu Principis bellum gesserit, delectumvè habuerit, exercitum comparaverit, l. 3. ff. ad L. Jul. Majest. Res enim mali

exempli credita est, exercitu conscripto Remp. in periculum aut discrimen conjicere. Atq; hinc apud plerasq; omnes gentes id demum bellum pro justo habetur, quod geritur autoritate ejus, qui summum in Rep. tenet imperium. Quo etiam pertinet Lex Platonis *lib. ult. de legib. Si quis privatim sine publico scitu pacem bellumve fecerit, capital esto.* Et quomodo privato alicui tale jus competere dicamus, quippe qui judicia habet superioris, in quibus contendere cum adversario possit? Cur enim ad arma & rixam procedere patiatur prætor, quos potest jurisdictione suâ componere? *l. 13. §. 3. ff. de usufruct.* Inter Principes autem ex necessitate bellum idèò introductum est, quoniam illi judicem superiorem non habent; neq; inter eos fori disceptationes esse possunt, nisi inter volentes. Alber. Gentil. *de jur. bell. lib. 1. c. 3.* Hactenus ergò dum ultima disceptatio non nisi per arma expediri potest, inter solos eos bellum justè geritur, qui sic summi sunt, ut publicorum appellationem mereantur soli. Ubi tamen simul id moneo, tentanda prius esse omnia, quàm ad arma deveniatur. Tunc enim utile solùm est ad arma concurrere, cum locum apud adversarios justitia non potest invenire. Modos verò, quibus vitari potest, ne controversiæ in bellum erumpant, enucleatè tradit Hugo Grot. *de jur. bell. & pac. lib. 2. cap. 23. num. 7. seq.*

XXX. Quandoquidem igitur illi soli competit belligerendi potestas, qui summum tenet in Rep. imperium, eadem illa Pontifici quoq; Romano, cujus majestatem aliquoties contemplati sumus, & præter eum aliis quoq; personis Ecclesiasticis, si quidem τὸ κύριον in territorio aliquo obtineant, tribuenda videtur. Sed enim ingens eâ de re sese hîc ingerit dubium. Antiquis enim canonibus, quorum plurimos recenset Gratianus *c. 23. qv. 8.* prohibitum est Clericis, arma movere aut secularem militiam exercere. Istam veterum disciplinâ prolixè exponit Claudius Espencæus *l. 2. digress. c. 6.* Et deplorat ibi statum Ecclesiæ hodiernum, quod dum Abbates, Episcopi & Archi-Episcopi simul Comites hodiè sint, Duces atq; Principes, ea potiùs ab illis suscipiantur & gerantur, quæ ad ampliandam provinciam spectant, quàm quæ Ecclesiæ possint esse utilia. Simus sanè, inquit, Domini temporales simul & spirituales, Abbates atque Barones, Episcopi, Archi-Episcopi, comites, duces,

Prim-

Principes, Reges denique, si quidem Dominus voluerit, principum beneficium & largitate. Nihil enim vetat alicujus civitatis aut provincie dominum creari, si idoneus reperiatur, Episcopum. - - Sint hæc per me omnia Ecclesiastici, & siue ex hereditate, siue Principum liberalitate merum imperium habeant, omnemq; jurisdictionem siue ipsi, siue eorum nomine alii exercent. - Sed optandum, ea ne gubernatio à spiritali eos procuracione avertat, duplicem gerant personam, sed ne neglectâ propriâ functione profana, multò minùs vel potiùs omnium minimè cruenta & bellica tractent, nisi fortè necessitate plusquam urgente. &c. Et post pauca: Ad tam itaq; multa, quæ Clericis omnia omninò arma bellica negant, scio cum Gratiano solitum responderi, propria quidem eos manu non debere arripere, sed alios, quibus hujusmodi officia commissæ sunt, ut ad oppressorum defensionem, & inimicorum Dei oppugnationem arripiant, Sacerdotibus hortari licere. - - Video tamen, veterem sanctioremq; clerum ab armis & cædibus non manûs modo, sed animum quoque cohibuisse, &c. Et post aliquàm multa, cum enumerasset, in priorè Ecclesiâ non armis, sed precibus pugnatum fuisse ab Ecclesiæ ministris, ita concludit: Et tales quidem fuerunt in utroq; Dei populo Sacerdotum inermium & pacificorum erga seculi dominos fideles & infideles, mites & barbaros victoria non minus gloriosa quàm incruenta: quibus non contenta posteritas veteris gentilismi ritu, togas in saga mutavit. Postquam enim exlex semel necessitas clero ad prælia non tantùm animum, sed manum etiam exeruit, factum est, ut cum tempore omnia deterente eundem ludum exercerent, simulatq; receptum est, ut profanas cum sacris ministeriis ditiones & tenerent & gererent. Nec tantùm contra barbaros & incredulos, sed ejusdem quoque nunc sanguinis, nunc patriæ, aut certæ fidei, Principes, Domini nostri Dei pacis quidam minùs pacifici vicarii bella indicerent & gererent exemplo scandalis infinitis gravido, & nulla Scripturarum aut canonum auctoritate probato &c. Subjungit deinde historiam Pontificum Romanorum, qui bella vel ipsi gesserunt, vel hortatu suo aliis, ut gererent, auctores fuerunt.

XXXI. Nolo hic disputare, quousq; & quibus conditionibus Clerico armis uti permissum sit. Id enim jam olim præstitit Jæcus famigeratissimus Dn. Tabor de exarmat. c. 4. §. 12. seq. Id ta-



tamen notatu dignum est; quod sapius decisum & practicum scribit Joh. Aloysius Riccius *decis. Neapolitan. 48. num. 7.* tùm de-  
 mum ob corporis sui tutelam insultatum Clericum armis uti pos-  
 se, quando in actu defensionis aliunde arripit arma; secùs verò si  
 ipse portavit arma, eisqve postea usus fuit in actu defensionis, nam  
 tunc videri cogitasse de bello & rixâ. Sed enim etiam hîc fortè  
 plùs tributum fuit Clericis, quàm licuit olim per jus Canonicum.  
 Quæsitus enim Nicolaus Papa de his clericis, qui se defendendo  
 paganum occiderunt, si postea per pœnitentiam emendari possint  
 ad gradum pristinum redire, aut ad altiore confendere, respon-  
 dit: *Scito, nos nullam occasionem dare, nec ullam tribuere eis licenti-*  
*am quemlibet hominum QUOLIBET MODO occidendi:* Et svadet  
 deinceps, ut Clericus, qui paganum se defendendo occidit, ab of-  
 ficio sacerdotali recedat. *c. 7. dist. 50.* In canone antecedente 6. di-  
 fertè dixerat idem Nicolaus Papa, discretos esse milites seculi à mi-  
 litibus Ecclesiæ, nec convenire militibus Ecclesiæ militare seculo,  
 per quod ad effusionem sanguinis necesse sit pervenire.

XXXII. De Clericis in genere cùm ita constitutum sit jure  
 Canonico, Sacerdotem summum, qualem se jactat Pontifex Ro-  
 manus, cur exemptum dicamus, causæ nihil subest. Ut maximè  
 igitur Majestatem tribuamus Papæ, propter provincias quas sum-  
 mo & absoluto imperio gubernat, non videtur tamen exercere pos-  
 se jus belli, quippe quod ex principiis juris Canonici incompatible  
 videtur cum Sacerdotio & Clericatu. Agnoscit istud discrimen  
 potestatis civilis & Ecclesiasticæ ipse Papa Nicolaus *c. cum ad ve-*  
*rum 6. dist. 96.* ubi utramque potestatem suis propriis actibus, digni-  
 tatibus & officiis ita sejungit & separat, ut neque potestas tempora-  
 lis jura spiritualis potestatis, neque hæc illius usurpare sine injuria,  
 possit. De quâ re videri possunt uberius Renatus Choppinus *lib.*  
*3. de sacr. polit. rit. 3. num. 12.* Dorscheus *dissert. de jur. Canon. sub Va-*  
*lent. Petr. Sacci nomine vulgat. p. 46. seq.*

XXXIII. Nec quicquam facit commentum Pontificiorum  
 de duplici Papæ potestate, temporali & spirituali, quam per duos  
 istos gladios, ab Apostolis ostentatos *Luc. XXII, 38.* innui, falso ja-  
 ctat Bonifacius IX. Papa *extravag. unam sanctam de major. & o-*  
*bed.* Fatetur enim Franciscus à Victoria *relect. 1. sect. 6. num. 19.* de  
 duo-



duobus gladiis in sensu literali nihil ibi haberi, sed Christum ostendisse, Apostolos habituros contradictionem, & necesse esse, habere defensionem, ipsos verò errantes dixisse: Ecce duo gladii hîc &c: Conf. quæ ex sententiâ Vice Cancellarii Imperii Georg. Sigism. Seldii notat Ludovicus de Monte Sperato *in vindic. pacif. Osnabrug. num. 31.* Eleganter autem totum hoc de armaturâ Papæ & Clericorum ex Luca verbis extractū *κρησφύτερον* convellit Erasmi Moria, cujus verba hîc adscribere non erit alienum: Magnus, inquit, Theologus, (intelligit autem Nicolaum de Lyra) ex Luca verbis sententiam expressit, tam consentaneam animo Christi, quam igni cum aqua convenit. Etenim cum immineret extremum periculum, quo tempore solent clientes maxime suis adesse patronis, & quantâ valent opes *συμπαχύν*; Christus hoc agens ut omnem huiusmodi presidiorum fiduciam eximeret ex animis suorum, percontatus est eos, numquid rei defuisset usquam, cum illos emisisset, adeò non instructos viatico, ut nec calceis muniret adversus spinarum & saxorum injuriam, nec penam adderet adversus famem. Ubi negassent, defuisse quicquam, adjecit: Sed nunc, inquit, qui habet sacculum, tollat, similiter & penam: & qui non habet, vendat tunicam suam, & emat gladium. Cum tota Christi doctrina nihil aliud inculcet, quàm mansuetudinem, tolerantiam, vitæ contemptum, cui non perspicuum, quid hoc loco sentiat? nempe ut magis etiam exarmet suos legatōs, ut non tantum calceos negligant & penam, verum & tunicam insuper abjiciant, nudique & prorsus & expediti munus Evangelicum aggrediantur, nihil sibi parent, nisi gladium, non istum, quo grassantur latrones, & parricidæ, sed gladium spiritûs, in intimos quog, pectoris sinûs penetrantem, qui semel affectûs omnes sic amputat, ut nihil jam illis cordi sit, præter pietatem. At videte, quæso, quorsum hac torqueat celebris ille Theologus. Gladium interpretatur defensionem adversus persecutionem; sacculum, sufficientem comœditiû provisionem: perinde quasi Christus commutatâ in diversum sententiâ, quod oratores suos parum *επιτιμῶς* instructos emisisset videretur, superioris institutionis palinodiâ canat, aut velut oblitus, quod dixerat (beatos fore, cum probris, consumeliis & suppliciis afficerentur, prohibens ne quando resisterent malo; mites enim beatos esse, non feroces) oblitus, quod illos ad passerum & liliorum exemplum vocarit, nunc adeò noluerit eos absque gladio profi-

proficisci, ut cum vel tunicâ dividendâ jubeat emi, malitq; nudos ire, quàm non accinctos ferro. Ad hæc, quemadmodum gladii nomine contineri putat, quicquid ad depellendam vim pertinet, ita marsupii titulo complectitur, quicquid ad vitâ pertinet necessitatem. Atq; ita divina mentis Interpres apostolos lanceis, balistis, fundis & bombardis instructos educit ad prædicationem crucifixi. Loculis item vidulis & sarcinis onerat, ne fortè non liceat illis è diversorio discedere, nisi impransis. Nec vel illud commovit hominem, quod enses, quem tanto-perè jusserat emi, mox idem objurgans jubeat recondi, quodque nunquam fando sit auditum, apostolos ensibus aut clypeis usos adversus vim Esbnicorum, utiq; usuros, si Christus hoc sensisset, quod hic interpretatur.

XXXIV. Cæterùm omnis controversia in his duobus maxime consistit, utrum personæ Ecclesiasticæ sacro officio destinatæ rectè tribuatur majestas civilis & imperium politicum: & posito, tribui eidem, utrum salvo statu suo jus belli exercere queat? De priori non multum laborabimus, cum ea sit seculi insolentia, ut se non patiat ad pristinam & candidam simplicitatem reduci. Si tamen dicendum quod res est, arbitror ego divinis & apostolicis institutis Clericorum imperia politica minus convenire. Quod ne frustrâ dixisse videar, videri velim ea, quæ congestit Hugo Grotius *de jur. bell. & pac. lib. 2. c. 22. num. 14.* Celebris est in hanc rem canon 83. inter vetustos illos, qui dicuntur Apostolorum, celebris etiam canon 185. Synodi Chalcedonenfis, quo utroque *σπᾱσεια* interdicitur illis, qui semel in clero cooptati sunt. Vocant autem *σπᾱσεια* non militiam quidem armatam, aut præfecturam militarem, quamquam etiam hæc Clericis ut incônveniens prohibita sit, sed civilem militiam h. e. magistratum vel dignitatem, *δὲ χῆρ, ἀξιῶν*. uti benè notat Christophorus Justellus in *Observat. ad Cod. canon Eccles. African. p. 125.* Atque ista cum probè secum ventilasset Georgius Wicelius, Vir Sixti Senensis judicio *l. 4. biblioth. variz eruditionis, Hebraicæ, Græcæ ac Latinæ lingvæ peritissimus ingenio excellens & sermone disertus*, cum multa alia rùm hoc imprimis reprehendit in Episcopis suæ ætatis, quod propemodum pudeat eos Episcopos dici, & audire tantùm principes gaudeant, imò quod illorum aula non sustineat patienter audire, si quis roget, ubi Rev. Episcopus

pus sit; præcisè dicendum esse: ubi reperiam meum gloriosum, Dominum & principem. Dicit autem, rectè notari illorum opinionem, aut potius assentationem, qui commiscuerunt in Pontificibus ac Episcopis Ecclesiasticam pariter ac politicam potestatem, *Quidenim, inquit, choro cum foro? quid gladio spiritus cum gladio carnis? Profectò Apostolus de Apostolis & horum successoribus aperit negat, arma illorum esse carnalia. Quæstio societas Christo cum Herode, aut Paulo cum Agrippa? Itaque magnoperè probamus istud discrimen, sicut discrimen ponimus inter calum & terram. -- Verum disputetur ad vivum investiganda veritatis ergò: utrum idem existere possit Pastor spiritualis & miles plus quàm carnalis? Ac jurene gestet altera manu pedum pontificale seu Episcopale & simul altera ense, cruentum, galeam thoracemq; martialem? Verum hæc sacra non aliter constant: tanto difficilius est, contra tractum fluminis niti, & cum suo depugnare seculo &c: Videantur plura in libro, quem inscripsit Viam regiam sub tit. ad artic. de potestat. Eccles. Tam parùm convenit institutis Ecclesiæ primitivæ & ipsi verbo divino potestas Papæ & Episcoporum temporalis sive civilis.*

XXXV. Sed fruantur tamen illi imperio aliquo politico, & summo etiam, quantumcunq; in Rep. fingi potest; certum nihilominus hoc est, propriis suis principiis juri Canonico insertis eos convinci, jus belli, se exercere non posse. Et hinc monstruosum videtur Cardinali Baronio ann. 888. n. 2. quod tam Episcopi quàm Abbates armati ad bella procederent, in hostes irruerent, caderent ipsos & caderentur ab ipsis, tanquam sacrorum Canonum violatores & muneris pastoralis & nominis desertores detestandi. Eodem modo Cardinalem Gvisum notat Gabr. Bart. Gramondus *hystor. Gall. lib. 8.* quod ex purpurâ Romanâ & sacro charactere rara in eum laus, eò quod militiam affectaverit, impatiens sui. *Non miles, inquit, quia Cardinalis, non item Cardinalis, quia miles erit. -- Indebitum certè characteri, quod in Engeriaca obsidione sæpè ferum in hostem strinxit, immemor Ecclesiam nescire sanguinem.* Nec aliud de Romano Pontifice, sicubi is bella gerere velit, aut potest aut debet ferri judicium. Et certè Leonis IX. proterviam atq; bellicosum animum gravi censurâ notavit Hermannus Contractus in *Chronico*, & post eum Petrus Damiani in *Epist. ad Firmum*, Vie



96.  
Bellarmini *lib. de Scriptor. Eccles.* iudicio valdè sanctus & devotus, sed qui propterea à Baronio *ad ann. 1053. num. 14.* hæreseos notà inuritur. Quàm promptos se & alacres bello præstiterint Pontifices alii, res notior est, quàm ut hic prolixius exponere oporteat, & vel ipsum hodierni Papæ Alexandri VII. exemplum abundè ostendit; sed cui profectò impune non fuit, lilia lacerare, & magni Galliarum Monarchæ iram in se concitare. Taceo jam Pontificum per sicarios procurata homicidia, de quibus videri poterit Marcus Anton. de Dominis *de Rep. Eccles. lib. 5. cap. 9. n. 21.* Talis ergò cum sit Sacerdos summus, non alii erunt inferiores, ne minùs sibi correspondere & consentire videantur caput & membra. Scilicet. *Præsul ut amptuat, inde & vulgu redemptuat olli.* Sed destinamus tandem camarinam istam ulterius movere. Sufficit enim id observasse, statum Pontificis Romani majestaticum minus convenire cum ejus officio sacerdotali, & adhuc minus potestatem belli gerendi. Cæteris omnibus, quibus majestatem tribuimus, etiam jus belli, quod non minimam majestatis partem constituit, tribuamus necesse est.

XXXVI. Proximum nunc est, ut quibus casibus id exercere liceat, quasi per summa capita dispiciamus, cum in hoc articulo non unis vicibus erreretur à principibus, quibus, cum potentiam suam & robur intuentur, faciliè persuadetur, ut hostem sibi quærant, & bellum incipiant planè extra necessitatem, ex solâ animi libidine. Quandoquidem autem nihil tam naturæ adversum est, quàm vis externa, & in hac tamen belli illati moles quàm maximè consistit, ipsa ratio svadet, non eligendam esse aut inferendam ejusmodi vim, nisi causa vehementissimè urgeat, & aliud non suppetat remedium, quo declinari bellum possit. Hinc igitur bella, quæ absque causâ suscipiuntur, pro ferinis habentur, & mera dicitur insania, si quis in bella fertur, periculorum propter ipsa avidus. Hug. Grot. *de jur. bell. & pac. l. 2. cap. 22. n. 2.* quin nec justis quidem ex causis bellum semper gerendum esse, ostendit idem *cap. 24. ubi num. 7.* optimè cum Theologis concludit, Regem qui ob causas leves & non necessarias bellum suscipit, teneri subditis ad reparationem damnorum, quæ inde oriuntur. Romani equidem famam justitiæ in bellorum causis obtinuerunt, certè affectarunt. *Cerrè quidem*

dem inqvunt Rhodii apud Livium lib. 45. *Vos estis Romani, qui idco felicia esse bella vestra, quia iusta sint, pra vobis fertis, nec tam exitu eorum, quod vincatis, quam principis, quod non sine causa suscipiatis, gloriaini.* Et tamen iidem illi bella saepe manifestè injusta susceperunt, uti de bello in Sardiniam & Cyprum dissimulare ipsimet haud possunt. Vid. Flor. l. 3. c. 9. Polyb. *hisor. lib. 3.* Add. Christoph. Forstner. *ad l. 3. annal. Tacit. p. 256. seqq.*

XXXVII. Nec verò dubitari debet, aliam nonnunquam palàm proferri & prætendi causam, aliam reverà subesse. Illam justificam vocat Grotius *de jur. b. & p. l. 2. c. 22.* & cum Polybio *Πόλεως*; hanc svasoriam & *αἰτίαν*. Causa prima & præcipua plerorumque bellorum est cupiditas & habendi aut fines dilatandi libido. Nec tamen ea unquam publicè profertur, sed prætextus aliunde sumitur, isque tantò cum elogiò, ut iustitiam strenuè mentiatur. Quod si nulla alia sese offerat causa, ad religionem confugiunt militantes, & omnium suarum actionum autorem DEUM faciunt, religionis & iustitiæ titulo ambitionem suam velantes. Suum quisque bellum sacrum prædicat, hostes quisque suos impios dicitur, suam quisque causam sanctam nominat. In ore omnium sanctum piumque versatur: consilio, conatu, animo secus agitur. *Liceat, inquit Dn. Hülsemannus p. m. in præfat. dialys. p. 54. hoc libere mihi profiteri, me, si Davidem, si Salomonem hodiè in terris videntes affirmare audiam, se solo puroq, ac nudo amore religionis movere hoc an illud bellum, & sumere arma in Naassum, Hanonem & vicinos Reges: submisitè rogaturum deliberandi spacium, ad indagandum: prophetico an politico spiritu id affirmassent? &c.* Tàm fallax scilicet hodiè est nomen religionis, ut DEUS, pietas, cultus divinus in speciem prætexantur. His enim sanctissimis nominibus multi non alio fine utuntur, quàm ut unius populi animos dividant, inimicos debilitent, in sociis Regnis sibi factiones parent, & animum atq; amorem alii debitum sibi furentur.

XXXIIX. Quandoquidem autem multæ & variæ occurrunt belli causæ, universas illas & singulas exactè considerare nostrum non fert institutum. Nonnullas tamen earum, quantâ fieri poterit, brevitate recensimus. Et quidem cum bellum vel offensivum sit vel defensivum, fieri potest & plerumque solet, ut

causa bellum defensivum justum faciat, quæ bellum offensivum planè injustum reddit. Quod enim quisque ob tutelam corporis sui fecerit, jure fecisse existimatur. Et cum inter nos cognationem quandam natura constituit, consequens est, hominem homini insidiari nefas esse. *l. 3. ff. de just. & jur.* Nefas est alterum akeri insidiari, non autem nefas est, contra insidiantem se defendere. Itaque si servum tuum latronem insidiantem mihi occidero, securus ero: nam adversus periculum naturalis ratio permittit se defendere. *l. 4. ff. ad L. Aquil.* Ita ergò religionis, extensionis imperii, opum cumularum causa non licet bello alterum infestare, infestanti tamen & invadenti ex eâ causâ, licet bello resistere, suamque religionem, fines imperii, bona & fortunas defendere. Et quod probè notetur, multo latiore habet ambitum defensio, quæ sit bello publico, quàm quæ privatis permittitur in aggreSSIONE privatâ. In privatâ enim insultatione jus quasi momentaneum est, & cessat, simulatque judicem adiri res patitur. At publicum bellum tractum habet. Publica enim offensio semper in hoste præsumitur, & metuitur, etsi adhuc non sit in actu, imò ne quidem in potentiâ nocendi proximâ. Justa ergò erit adversus hostes defensio, non ea tantum, quæ adhibetur nondum expectatâ offensione speciali. sed etiam ea, quæ hostem fugientem persequitur propter violentiam scilicet successivam, quæ etiam in hoste fugiente justè metuitur. Quibus accedit porro, quod in insultatione privatâ mera consideretur defensio; at publicæ potestates cum defensione simul ulciscendi jus habent, propter quod prævenire illis vim non præsentem licet. Hug. Grot. *de jur. bell. & pac. lib. 2. c. 1. num. 16.* Sed hoc tamen casu necesse est, ut constet non tantum de armaturâ & potentiâ hostis, quam metuimus, sed etiam de animo, & quidem ita constet, ut certum id sit eâ certitudine, quæ in morali materiâ locum habet. Hug. Grot. *l. 2. c. 22. n. 5.* Aliàs enim ad anticipationem, & præventionem non sufficit metus, quanquam sufficiat ad apparatus defensionis & conscribendum militem. Dn. Strauch *exerc. exoter. g. n. 15.*

XXXIX. De causis belli offensivi justificis multum disputatum fuit superiori seculo propter Hispanorum in Indias expeditionem, quò jure scilicet Hispani Americam subjugaverint, aut  
subju-



subjugare potuerint. Et quia tunc temporis conquesta fuerunt omnia, quæ quovocumque modo causam Hispanorum adjuvare posse credebantur, ista hinc veluti in Tabellâ proponemus, & quidem verbis Francisci à Victoriâ Viri, Bellarmini iudicio, egregiè docti, qui *Relat. 5.* tribus integris sectionibus argumenta ista admodum eruditè examinat. Omnia autem ad verbum exscribere cum prolixum sit, & præter institutum nostrum, summa inde excerpemus capita, adjunctâ quâdoque, ubi opus fuerit, per intercalarem commentarium nostrâ Episcopi.

XL. Primâ sectione istas defendit propositiones: Indis non debere auferri dominium, idè quod sint peccatores *n. 5. & 6.* nec idè quod sint infideles *n. 7.* nec idè quod sint amentes aut insensati *n. 22. seq.* Sectione secundâ contendit, primò, Imperatorem non esse totius orbis dominum *n. 1.* (Vid. quæ dixi *exercitat. 2. lib. 14. 15. 16.*) & quamvis dominus esset, non tamen posse occupare provincias barbarorum & constituere novos dominos *n. 2.* (acquirendæ enim & amittendæ possessionis jura etiam in provinciis & integris imperiis locum habent, quâ ratione alienari possunt integræ regiones & populi, possunt pro derelictis haberi, possunt usucapi, possunt alteri auferri &c. Vid. Cl. Conring. *de finib. imperii lib. 2. p. 343. seq.*) secundò, *papam non esse dominum civilem aut temporalem totius Orbis, loquendo de dominio & potestate civili, & oppositam sententiam esse contra præceptum Domini Luc. XXII, v. 25.* (non convenit ergò Victoriæ cum Angelo Carerio, Thoma Bozio, Abrahamo Bzovio & aliis, qui Papam Romanum in temporalibus & spiritualibus directam in universi Orbis terrarum dominia habere potestatem frustrâ renitente Bellarmino contendunt) *nec Papam habere jurisdictionem spiritualem super infideles,* (dicit tamen Henricus Segusianus Cardinalis Ostiensis, referente Bellarmino *l. 5. de Rom. Pont. c. 1.* per Christi adventum omne dominium Principum infidelium translatum esse ad Ecclesiam, & residere in summo Pontifice, & idè posse Pontificem regna infidelium jure suo donare, quibus voluerit fidelium) *nec valere argumentum à potestate Christi ad potestatem Papæ n. 3.* (Sed in Concilio Tridentino placuit, pro determinato esse habendum, sicuti Christo data est omnis potestas in cælo & in terrâ, ita pari potestate munitum

Pontificem Romanum ejus vicarium , referente Petro Syav. *hif. Concil. Trid. lib. 8.*) *Quin etiamfi Papa haberet potestatem ſecularem in toto orbe , non poſſe tamen illum dare eam Principibus ſecularibus , eſſet enim annexa papatui n. 4.* ( poſito, Papam eſſe vicarium Chriſti, nihil poterit eſſe papatui annexum , niſi qvòd Chriſtus diſcretè ita voluit. At regnum ſuum non eſſe de hoc mundo, ſimplici ore profeſſus eſt Chriſtus, qvòmodo ergò papatui id poſſet eſſe annexum) *Papam tamen habere potestatem temporalem in ordine ad ſpiritualia , i. e. quantum neceſſe eſt ad adminiſtrationem rerum ſpiritualium* ( nullam eſſe talem potestatem, oſtendit Joh. Davenantius *qvæſt. 4. pag. 21.* & generaliter dominatum univerſalem nullo neq; humano neq; divino, neq; Eccleſiaſtico jure Papæ competere, graviffimè evictum eſt à Gvil. Barclajo *de poteſt. Pap.* & ejus Hyperaſpilte, Johanne Roſſenſi Episcop. *in tr. de poteſt. Pap. temp.* itemq; à Chamiero *in Panſtrat. Cath. tom. 2. l. 15. c. 14. 15. 16.* ) *poſſe cum hâc ratione leges civiles infringere , poſſe Reges deponere & novos conſtituere* ( impudentiſſima hæc eſt doctrina ex Hildebrandi ſive Gregorii VII. diſtictibus primùm nata, qvæ tanta deinceps incrementa cepit, ut non propter impietatem modò , ſed propter imperitiam quoq; vel ignaviam regnandi à Pontificibus Reges, ut à dominis prædiorum villicos, deponi poſſe doceretur ; hinc enim ſcribit Becanus *in contr. Anglican. p. 146.* idem juris Pontifici in Reges eſſe, qvòd opilioni ſit in canes. Sed qvàm infirmi huic aſſertioni ſubſtituantur tibicines, alibi oſtenditur ) *& licet hoc vel non faciat Papa vel non ſepè faciat, fieri tamen id, non quia non poteſt* ( poteſtas illa eſt affectata, tyrannica & præſumpta ) *ſed quia timet ſcandalum , ne Principes putent, hoc facere per ambitionem* ( uti reverà eſt, & cordati omnes hætenus crediderunt ) *vel veritus rebellionem Principum à ſede Apoſtolicâ* ( hætenus ergò ratio ſtatus ejusmodi fulmina impedit ) *Episcopos etiam habere hoc modo autoritatem temporalem in ſuo Episcopatu eadẽ ratione, qvâ Papa in orbe. num. 5.* ( at cautum hoc in Concilio Tridentino , ne Episcopì in ſuâ diocceſi Papæ ſibi partes ſumerent, qvòd paſſim docet Petrus Syavis ) *Etiamſi barbari nolint recognoscere dominium aliquod Papæ, non ideo tamen poſſe eis bellum inferri & bona illorum occupari.* Hiſpanos ergò, cùm primùm navi-

garunt

garunt ad Terras barbarorum, nullum jus secum attulisse occupandi provincias illorum n. 7.

XLI. Tertiò, concludit, *Indiam non factam fuisse Hispanorum jure inventionis, habuisse enim suos dominos n. 7.* Quartò, *Indos malè propter eà bello peti, quia nolint recipere fidem Christi, postquam illis proponeretur n. 6. 7. 8. imò post sufficientem informationem in fide Christianà non licere eos bello persequi & spoliare bonis suis. Bellum enim nullum argumentum esse pro veritate fidei Christiane, ergò per bellum barbaros non posse moveri ad credendum, sed ad fingendum se credere & recipere fidem Christianam, id verò immane & sacrilegum esse, n. 14. 15.* (ad quid ergò sæviunt Pontificii inquisitionibus suis, & bella movent in reformatos?) Quintò: *Principes Christianos etiam autoritate Papæ non posse còercere barbaros à peccatis contra legem naturæ, nec ratione illorum eos punire n. 16.* (Vid. Joseph. à Costa de procurand. Indor. salut. lib. 2. c. 3. 4 5.) Sextò: *Falsum esse, Indos Regem Hispania pro domino ac Rege suo recepißè, aut si factum factum id non sine vi & metu.* Septimò: *malè argui, justo DEI judicio omnes istos barbaros condemnatos ad perditionem. Et si enim hoc ita sit, non tamen illum qui perdit, propter eà esse extra culpam.*

XLII. Sectione tertià præmittit, se de falsis & non idoneis titulis hætenus egisse, velle se nunc agere de legitimis & idoneis. Inter hos recenset primò *naturalem societatem & communicationem, & facit sequentes propositiones (1) Hispani habent jus peregrinandi in illas provincias & illic degendi, sine tamen aliquo nocumento barbarorum, nec possunt ab illis prohiberi* (quidnè? cùm & privatus possit prohibere, ne Titius fundum suum ingrediatur, l. 13. §. ff. de injur. Et fortasse justæ possunt esse prohibitionis causæ, inter quas haud postrema est metus periculi ab extraneo adveniente, præsertim si catervatim integras secum naves advexerit. Sufficit iste metus ad denegandam receptionem, cùm libero homine indignum sit, ab altero periculum expectare & ad injurias nudari. Vid. Dn. D. Strauch. diff. de imper. mar. cap. 8. num. 2.) Idcirco rectè Albericus Gentilis l. 1. de jur. bell. cap. 19. ad illud de Amorthæis: Teneo, inquit, cum Augustino, si nec timendum sit, ne noceatur, & certum sit, noceri non posse.) (2) licet Hispani negociari apud illos, nec vel



40  
*bi vel illi à Principibus suis possunt prohiberi. ( At è contrario Ludovicus Molina de just. & jur. tract. 2. disp. 145. nullam gentem seu Rempubl. teneri vult, sive cum periculo sui, sive sine periculo, commercia aut hospites externos admittere, nisi gravi imminente necessitate aut fœdere, aliòvè jure singulari interveniente. Et quanquam commercia eum in primis finem habeant, ut alterius indigentia succurratur, nemo tamen, qui indiget, jus exigendi inde accipit, & possunt utiq; prohibere Principes aut limitare commercia pro ratione copiae aut inopiae, damni aut incommodi in Remp. redundantis, atq; aliarum circumstantiarum, quemadmodum ipsi etiam Hispani commercia se in utrisq; Indiis cum aliis nationibus prohibere posse apertè profitentur.) (3) si qua sunt apud barbaros communia tam civibus, quam hospitibus, non licet barbaris prohibere Hispanos à communicatione & participatione illorum, e.g. si licet aliis peregrinis effodere aurum, etiam Hispanis licebit. n. 4. (Sed multae possunt incidere causae, propter quas ista talia Hispanis negari, aliis verò nationibus permitti possint, ut si Hispani aurifodinas nimium exhauriant & attenuent &c.) (4) Si ex aliquo Hispano nascentur ibi liberi & velint esse cives, non videtur, quod possint prohiberi, vel à civitate vel à com. modis aliorum civium. num. 5. (at jus civitatis apud plerasq; gentes ita limitatum fuit, ut non promiscuè unicuiq; conferretur. neq; vel ipsi quidem Hispani tam liberales erunt in conferendo suae civitatis jure. Et si hoc Hispanis concedendum esset in Indiis, cur Hispani Judæorum octingenta millia, & alio tempore Maurorum nongenta millia imperio suo ejecerunt, notante Marianà lib. 36. c. 1. & Johanne de Laet Hispan. c. 4. n. 5.) (5) Si barbari velint prohibere Hispanos in suprà dictis, Hispani primò debent ostendere, se non venire ad nocendum illis, sed pacificè velle hospitari, quæ si acquiescere nolint, & vi agere velint, tùm possunt se Hispani defendere, arces & munitiones adificare & alia belli jura agere. Sed si victoriam Hispani obtinuerint, non debent occidere illos, vel spoliare vel occupare civitates eorum, quia barbari natura sunt meticulosi & stolidi, & igitur hoc casu innocentes. Et ideo debent Hispani se tueri, sed quantum fieri poterit cum minimo detrimento illorum, quia est bellum duntaxat defensivum n. 6. (methodus ista belli defensiva vix unquam observata est aut observari potest. Non enim*

202  
fatis congruunt ea: hostem habere, eumq; vincere, nec tamen vincendo decidere aut spoliare posse, non occupare posse civitates ejus. Imò verò dum Hispani invitis Indis castra & munimenta ædificant, hostes se constituunt & offensivis belli actibus eos laceßunt, adeoq; non erit vitio vertendum Indis, sicubi castra ea & munimenta oppugnent, & quantum in ipsis est, destruere conentur.) (6) Si omnibus tentatis Hispani non possunt consequi securitatem cum barbaris, nisi occupando civitates & subjiciendo illas, licetè possunt hoc etiam facere (at verò bellum ob commercia negata, nisi contra fœdus pristinum negentur, aut ex præeunte aliquo titulo commercandi singulari potestas ea pendeat, justè suscipi simpliciter nego.) (7) Si barbari perseverent in malitiâ, possunt Hispani non tanquam cum innocentibus, sed tanquam cum perfidis hostibus agere, & omnia belli jura in illos prosequi. (euge, quàm bellè nunc cohærent omnia. His enim argumētis blanditur Monarchia Hispanica, ut totum sibi, quem toties in conceptibus habuit, subjiciat Orbem Terrarum. Sed profectò, tantæ ea non sunt, ut cum iis velis in tenebris micare.)

XLIII. Secundum titulum idoneum occupandi Indias facit *propagationem religionis*, circa quem istas constituit propositiones 1. *Christiani habent jus predicandi & annunciandi Evangelium apud Barbaros* (jus tale, si quod esset, non posset exerceri invitis & reluctantibus Indis, nisi fieret legitimâ autoritate superiore. Sed & nullum divinum mandatum urget itetandi doctrinam publicam apud ullam gentem, postquam singulis jam olim verbum divinum annunciatum fuit. Dn. Hülsemann. in brev. c. 19. num. 6. Sed hæc magis ad Theologos spectant.) 2. *Et quàmvis liceat hoc omnibus, potest tamen Papa negotium hoc committere solis Hispanis, & interdicare omnibus aliis.* (Præsupponit hæc propositio Episcopatum Papæ Oecumenicum, quem commentitium esse & magno Ecclesiæ malo introductum Orthodoxi omnes perpetuo agnoverunt. Diximus eâ de re aliqua exerc. 7.) 3. *Si barbari permittant Hispanos liberè & sine impedimento predicare Evangelium, siue illi recipiant fidem, siue non, non licet hæc ratione intentare illis bellum, nec aliàs occupare terras illorum n. 11.* (Qvis verò siue barbarus siue moratiorum aliquis admissurus facilè erit Evangelium Hispanorum,  
E rum,

rum, quo ab initio compellatos fuisse Indos memorat Antonius de Herrera, & ex eo Johannes de Laet *præfat. in Americam*. Audiamus ex eo aliqua: Ego NN. minister summorum & potentissimorum Regum Castellæ & Legionis, notum vobis facio, quibus possum modis, unum & æternum DEUM Dominum nostrum creavisse Cælum & Terram. - Omnium nationum & populorum curam DEUS habere voluit unum virum, qui dicitur Petrus, ita ut dominus & supremus arbiter esset omnium & singulorum hominum huius universi, ut ipsis imperares, & veluti caput esset universi generis humani, ubicunq; tandem degerent & quamcunque legem, fidem aut sectam sequerentur, mancipaviq; illi universum Orbem, & licet ipsi mandaret thronum suum figere Roma, loco opportunissimo ad gubernandum, tamen liberum ipsi reliquit in aliâ quâvis orbis parte illum stabilire ad iudicandum & regendum populos, Christianos, Mahumetanos, Iudeos, gentiles, & cuiuscunque tandem fidei & superstitionis. Hic dicebatur Papa. - Unius horum supremorum Sacerdotum, ut Dominus Orbis donavit has insulas & continentem in & ad Oceanum sitas, Catholicis Regibus Castellæ & Legionis. - - Obsecro itaque & quibus possum modis contendo, ut sanctam Ecclesiam agnoscatis Heram & dominam universi Orbis, & summum sacerdotem, qui dicitur Papa, ipsius nomine, atque M.S. illius loco supremum dominum & Regem Insularum & continentis ex virtute dictæ donationis. - Sin contra feceritis, aut malâ fide moras neccatis, denunciatio vobis, me - Uxores vestras & liberos abducturum & mancipaturum. - Eripiam vobis bona vestra, & multabo, quantumcunque potero calamitatibus, uti vassallos, qui detrectant dominum suum agnoscere. Bellum sanè hoc est Evangelium, quod regnum prædicantis de hoc mundo esse contendit, quodq; ferrum & flammam minatur, nisi actutum ei paruerint homines. Qvis autem inter Principes planè ignotos, & absolutos terrarum suarum dominos feret aut tolerabit tale Evangelium? quis præconem admittet talia intentantem & sibi insidiantem?) 4. Si barbari impediunt Hispanos, quo minus liberè annuncient Evangelium, Hispani reddita prius ratione ad tollendum scandalum possunt illis invitis prædicare, & si sit opus propter hoc bellum suscipere vel inferre. Idem esto iudicium, si etiam permittentes prædicationem impediunt conversionem occidentes vel aliter pu-



708.  
nientes conversos ad Christum, vel minis aut terroribus alios deter-  
rentes. (At supra confessus est Victoria, bellum non esse argumen-  
tum pro veritate fidei Christianæ. Disertè Apostolus: *Servum Do-*  
*mini non oportet pugnare, sed placidum esse erga omnes, aptum ad*  
*docendum, tolerantem malos, cum lenitate erudientem eos, qui con-*  
*trario sunt animo affecti, si quando det eis DEUS fortè resipiscantiam*  
*ad agnitionem veritatis.* Et certè religionis jus hominibus cum ho-  
minibus propriè non est, sed inter Deum & hominem; itaq; neq;  
jus læditur hominum ob diversam religionem, & proinde nec  
bellum inferendum est causa religionis. Alber. Gentil. *de jur. bell.*  
*lib. 1. c. 9.* Nec verum est, quod ait Didacus Covarruvias *in c. pecca-*  
*tum de reg. jur. in 6. §. 10. n. 3.* per impeditionem gentilium injuriam  
fieri Christianis habentibus jus prædicandi per universum orbem,  
& ratione propulsandæ hujus injuriæ bellum justissimum esse.  
Dixi enim jam, jus istud non esse inter hominem & hominem, ut  
aliqua homini possit inde inferri injuria, sed inter Deum magis &  
hominem; & proinde valdè iniquum est, conscientiis imperare vel-  
le. Add. Joseph. à Costa *de procurand. Indor. salut. lib. 2. c. 2.*)

XLIV. Tertium titulum dicit esse non solùm religionis, sed  
etiam *amicitia & societatis humana*; scilicet *si qui ex barbaris con-*  
*versi sint ad Christum, & principes eorum vi aut metu velint eos revo-*  
*care ad idololatriam, Hispanos etiam hâc ratione posse movere bel-*  
*lum pro novis suis amicis.* (Hanc sententiam prolixè defendit Ste-  
phanus Junius Brutus *in vindic. contr. Tyrann. qv. 4.* sive Philippus  
Mornæus is fuerit, uti putat Hugo Grotius *in apolog. contr. River.*  
sive Hubertus Langvetus, uti ex indicio Simonis Goulartii credit  
Gisbert. Voëtius *disp. part. 2. f. 851.* Eandem sententiam tuentur Al-  
bericus Gentilis *de jur. bell. l. 1. c. 16.* Hugo Grot. *de jur. bell. & pac. l. 2.*  
*c. 25. n. 8.* Sed enim ut bello assistere alterius Principis subditis in  
causâ religionis liceat, non sufficit qualiscunq; injuria aut vis pro-  
pter religionem illata, sed imò tanta requiritur, ut superet inju-  
riam, propter quam aliàs extra religionis causam, subditos alienos  
adversus Principem tueri licet, aut saltem causa illic debet esse evi-  
dentior. Cùm enim verus DEI cultus per divinam revelationem  
innotescat, & hinc stultitia videatur hominibus supernaturali au-  
xilij destitutis, non potest non ille contemni ab iisdem & injuriis

affici, ut adeò genus istud injuriarum ferè ex ignorantia committatur; injuriæ autem quibus vita & fortunæ proximi aliis ex causis afficiuntur, ex lumine naturæ satis probant suam ἀνομιαν; consequens hinc est, facilius in his quàm illis punitionem locum invenire. Hülsemann. in brev. ar. c. 20. n. 13. Quocirca si vel maximè Princeps subditos suos Christianâ religione imbutos honoribus arceat, templa iis neget aut interdicat, carcere puniat &c. non licet propterea vicino principi Christiano bellum movere, præsertim cum non privatis solum, sed etiam principibus Christianis incumberet perferre injurias religioni suæ illatas.)

XLV. Quartum titulum idoneum ita explicat Victoria: *Si bona pars barbarorum conversi essent, posset Papa dare illis Principem Christianum, & auferre alios dominos infideles* n. 14. (Atqui sectione primâ n. 7. concessit Victoria, non auferri debere Indis dominium, idè quod sint infideles. Infidelitas namq; non est peccatum pugnans cum societate civili, sed potest utiq; etiam sub idololatriæ magistratu consistere tum Ecclesia, tum Respublica. Unde & in casu inverso Princeps Christianus injuriam facit subditis suis, si infidelitatis nomine poenâ eos afficiat. Deinde, quod eam potestatem Papæ tribuit Victoria, in eo iterum Episcopatum ejus Oecumenicum præsupponit, quem tamen commentitium planè esse & tyrannicum in ipso Papatu multi agnoverunt, & à nostratibus ad nauseam usq; ostensum est. Imò verò solet Pontifex non expectatâ conversione barbarorum terras eorum principibus Christianis donare, in quas tamen non magis ipsi jus est, quàm subulco Wittebergeni in urbem Romam. De Henrico secundo Rege Angliæ refert Matthæus Parisius in ann. c. 13. C. LV. rogasse eum per nuncios solennes Papam Adrianum IV, ut sibi liceret Hiberniæ insulam hostiliter intrare, & terram subjugare, atq; homines illos bestiales ad fidem & viam reducere veritatis, idq; Papam Regi gratanter annuisse. Vocatus quippe erat Papa in partem prædæ, & promiserat Rex beato Petro de singulis domibus annuam unius denarii pensionem. Nihil dixerat Henricus de Christianis jam in Hiberniâ degentibus, quorum intuitu moveri potuisset Papa ad bellum istud decernendum, sed bestialitatis solum causam adduxit, illamq; tam sufficientem esse putavit Papa, ut perito Henrici annuere.

Clau-

Clarius id patet exemplo Gentium & regionum Americanarum, quas itidem, cum vix inventæ essent, ante omnem prædicationem Evangelii ab Hispanis factam, dono dedit Papa Regi Hispanorum. *Ut tantam, inquit in diplomate, provinciam Apostolica gratis largitate donati liberius & audacius assumatis, motu proprio, non ad vestram vel alterius pro vobis super hoc oblata petitionis instantiam, sed de nostrâ merâ liberalitate, & ex certâ scientiâ ac Apostolica potestatis plenitudine, si diis placet, omnes insulas & terras firmas, inventas & inveniendas, detectas & detegendas versus occidentem & meridiem - auctoritate omnipotentis Dei nobis in B. Petro concessâ, ac vicariatus Jesu Christi, quâ fungimur in terris, cum omnibus illarum dominis, civitatibus, castris, locis & villis, juribusque, & jurisdictionibus ac pertinentiis universis, vobis hæreditibusque, ac successoribus vestris Castella ac Legionis Regibus in perpetuum tenore presentium donamus, concedimus & assignamus &c.* Editum est istud diploma Ann. clō cccc XCIII. cum anno præcedente primum inventæ fuissent istæ terræ, nec ullum adhuc Christianæ fidei in istis existeret initium, certissimo argumento nimium liberalem esse Pontificem Romanum in re aliena, & merito propterea derisum fuisse ab Indorum Regulo.

XLVI. Quintus titulus constituitur propter tyrannidem vel ipsorum dominorum apud barbaros, vel etiam propter leges tyrannicas in injuriam innocentum, puta, *quia sacrificant homines innocentes vel aliâs occidunt ad vescendum carnibus eorum, num. 15.* (Non est hic titulus legitimus belli aggressivi, præsertim cum ista trucidatio non fiat in vitis iis, quorum gula petitur, & moribus ita receptum sit, ut carne humanâ sibi & numini suo epulas instruant. Supra etiam *sect. 2. num. 16.* ipse docuit Victoria, nec auctoritate quidem Papæ posse Principes Christianos punire barbaros propter peccata contra legem naturæ. Infideles enim non subditi per peccatum contra legem naturæ nullam faciunt injuriam Principibus Christianis. Ergo nec bello infestari propterea ab eis possunt. Petr. Binsfeld. *in tit. de injur. & damn. dat. c. 8 conclus. 31.* Quod faciunt verba Bellarmini *lib. 3. de Laic. c. 15. § secunda conditio*: Princeps inquit non est judex nisi hominum sibi subditorum; ergo non potest quæcumque peccata aliorum hominum punire, sed solum ea, quæ cedunt in detrimentum populi sibi subditi &c. Non igitur sequitur



468  
Delicta infidelium & peccata contra naturam sunt punienda: Ergo Christianis licet eos bello invadere. Accedit, quod defensio cum minimo lædentiis damno debeat exerceri. At constat, bello Indico plures infinitis partibus absumi, quàm ullâ barbarorum tyrannide, ut aded ad avertendam hanc longè gravius damnum inferatur eorum provinciis. Joseph. à Costa *de procur. Indor. salut.* l. 2. c. 6.

XLVII. Sextum titulum dicit esse *venum & voluntariam electionem*, scilicet si barbari ultro acceperint in Principem Regem Hispania n. 16. (At si barbari illi suos adhuc habeant Principes, & ab eis deficient, atque Hispaniæ Regem sibi dominum eligant, non magis recipiendos eos esse arbitror, quàm servum privati fugientem, & novum sibi dominum quærentem. Tenetur enim ille quoque de servo corrupto, qui servum alienum recepit, h. e. refugium abscondendi causa servo præstitit vel in suo agro, vel in alieno loco ædificiove, l. 1. §. 1. ff. de serv. corrupti. Dictitat etiam hoc ratio naturalis, non faciendum esse alteri, quod fieri sibi ipse quis nolit. Et tamen perpetua hæc est magnorum principum cupiditas, ut subditos alienos principi suo rebellantes recipiant, eosque armis defendant, & principatum sibi delatum non recusent, parum considerantes, quo jure, quâve injuriâ id contingat. Non ergo consistet iste titulus, nisi supponas vel subditos principe destitutos, vel subditos unâ cum principe suo in imperium Regis Hispaniæ consentientes. Sed neutro tamen hoc casu bello opus erit.)

XLIX. Septimum & ultimum titulum facit *causam sociorum & amicorum*. Veluti, si barbari inter se bellum gerentes accersant in auxilium Hispanos n. 17. (Hæc quidem ratione sociis & amicis assistere licet, uti ista etiam bella probat Hugo Grot. *de jur. bell. & pac. lib. 2. c. 25. n. 4. 5.* sed interest tamen, utrum socii & amici accersentes Hispanos absolutum gerant imperium, & jus belli habeant, an verò ab iis, adversus quos militem conscribunt, defecerint, h. e. an pares imperio sint barbari inter se dissentientes, an verò imperantes & subditi hostiliter congregiantur. Priore casu, si in partes vocati fuerint Hispani, optimo jure assistere possunt vocantibus; sed posteriore casu, quia rebelles in rebellionem suâ non sunt

con-

confirmandi, subditis descendentibus minimè auxilium præstare poterunt Hispani, poterunt tamen id præstare imperantibus.)

XILX. Et hæc quidem ex mente & ad mentem Francisci à Victoriâ dicta sufficiant, ex quibus nunc faciliè constat, quid de bello Hispanorum adversus Americanos sit sentiendum. Istud tamen tam immane atq; cruentum fuit, ut quadraginta quinque annis, inhumanis planè carnificinis plusquam ducenties centena millia Indorum perierint, & ad solitudinem redactum sit terrarum spaci-um tam amplum, ut decimo tanto sit totâ Hispaniâ majus. Simul etiam constat, quibus ex causis offensivum aliquod bellum geri debeat aut possit. Cæterum cum causæ adhuc aliæ dari possint, univerlas eas ad duo summa capita redegit jus Canonicum *c. dominus 23. q. 2. Justa bella*, inquit, *solent diffiniri, quæ ulciscuntur injurias. Sic gens & civitas petenda est, quæ vel vindicare neglexerit, quod à suis improbè factum est, vel reddere, quod per injurias ablatum est.* Justa igitur belli offensivi causa est vel justa vindicta vel rerum injustè ablatarum repetitio. de quibus prolixius agit Gerhardus *Loc. de Magistrat. polit. n. 402. seqq.*

L. Circa vindictam id unicum maximè dubium occurrit, utrum propter negatum exercitui per terram alienam transitum Domino illius terræ justè inferatur bellum? Albericus Gentilis *lib. 1. de jur. belli c. 19.* in utramque partem disputat, sed eò tandem inclinatur, ut tum demum justam esse putet belli causam, ubi causa negati transitus nulla fuerit. Hugo Grotius simpliciter definit, postulandum prius esse transitum, sed si negetur, vindicari posse. *l. 2. de jur. bell. & pac. c. 2. n. 13.* Uterque præeuntem sibi laudat Augustinum, cujus verba exscripsit Gratianus *c. notandum 23. q. 1. 2.* ubi justum dicitur bellum Israelitarum contra Amorrhæos propter denegatum transitum, quod illustrat Petrus Binsfeld. *ad tit. de injur. & damn. dat. c. 8. conclus. 24.* Sed Gerhardus *loc. de Magistr. nu. 411.* ex alio capite justitiam istius belli Israelitici deducit, nempe ex eo, quod Rex Amorrhæorum ipse egressus fuerat è sinibus suis cum exercitu, & Israelitis injuriam intulerat. Puto igitur, justè denegari transitum, nec justam inde duci belli causam. Quod enim de communi usu viarum & libertate transeundi objiciunt nonnulli, id semper ita temperandum est, ut Reipublicæ causa po-  
tior

410  
tior habeatur. Nec quod privato concedendum est, illicò ad integros exercitus extendere licet. Plurimæ possunt subesse causæ, propter quas transire prohibetur exercitus, & inter eas haud levis momenti est metus futuri periculi. Quod enim jus meum trans-eundi metu tuo non tolli contendit Grotius, verum quidem est, nisi accefferit prohibitio. Finge, jus tibi esse per fundum meum & prædium urbanum eundi, ambulandi; si tu frequenter iveris cum flammis & faculis, ut metus sit, ne damnum inferatur prædio meo, jus quidem tuum eundi metu meò non tollitur, sed ego tamen prohibere possum, ne ita eas cum flammis & faculis, & tùm tollitur jus eundi taliter. Et dum Grotius rationes cavendi enumerat, quibus metum dispellere queamus, ex iis evincitur, quamdiu ita cautum non fuerit, justum esse penes me metum, & ex eo Jus tuum hæcenus impediri. Plurima autem transitus ejusmodi secum fert haud rarò incommoda, quibus avertendis nulla idonea est cautio. Ita contingere potest, ut alter ille, adversus quem bellum geritur, occurrat transeunti in regione inter mediâ, & sic belli sedes in eâ figatur; potest evenire, ut transeuntium consuetudine mores civium corrumpantur, & ejusmodi alia, quæ profectò tanti sunt, ut meritò denegetur transitus. Sed & ex omnium seculorum moribus patet, liberum, quem jactitant, transitum, non armatorum tantùm hominum, sed aliorum etiam ita semper à Principibus territorii dominis temperari solere, ut pro variante commodi publici curâ permittatur interdicaturve. Vid. Joh. Seld. *in mar. claus. lib. 1. c. 20.*

LI. Ut maximè autem justa aliqua proponatur belli gerendi causa, & vel mille alii asseverent, sibi delictum ab adversario commissum tale videri, ut bello vindicari oporteat, si tn. Principi bellum gesturo causa ea evidens aut sufficiens non videatur, præstat abstinere bello, quam contra conscientiam in effusionem sanguinis humani consentire. Et imò multo evidentior debet esse causa, ut bellum decernatur, quam esse debet corpus delicti à privato commissi, ut sententia feratur condemnatoria. Similiter si Principi tantùm causa appareat justa & evidens, plurimis autem aliis talis non videatur, cum falli possit opinio Principis, non potest ille nec debet bellum decernere, sed judicio potiùs arbitrarium nego-



negocium committere debet. Atque id non solum de bello vindicativo & offensivo verum est, sed etiam de defensivo. Cum enim bellum sine homicidiis geri non possit, homicidium autem peccatum sit; nemo etiam defensivè potest alterum occidere, nisi evidenter perspectum habeat, se jure id possidere, quod cædibus aliorum defendit. In dubio autem potius vitam & omnia temporalia perdere debet, quata citra evidentem causam flagitii & necessitatis, alium occidere. Vasquez. *disp. 64. c. 3. n. 13. seq.* Petr. Binsfeld. *de injur. & damn. dat. c. 8. concl. 7. & 8.* Unde ad stipulari nequeo Jacobino de S. Georgio, qui *lib. de feud. §. & promiserunt n. 6.* bellum justum dicit, non tantum id quod pro tali habetur in consilio principis, sed quod ipse solus etiam ita declarat princeps.

LII. Quemadmodum autem in privatis litibus non nisi penes unam partem justitia causæ verè consistit, ita etiam in controversiis publicis & bellis inde nascentibus. Vicissim tamen, quemadmodum in privatis litibus utraq; pars justè causam suam tueri potest, non obstante, quod una tantum ex parte causa justa existat: ita & in bellis publicis inconveniens non est, ut cum ex una parte sit jus, ex altera ignorantia invincibilis, ex utraq; parte bellum justè geratur. Francisc. à Victoria *relect. 5. sect. 3. num. 6. & relect. 6. num. 32. 33.* Scilicet justè agere interdum aliquis dicitur, quoties injustè non agit, etiamsi id, quod agit, justum non sit, quomodo etiam Aristoteles τὸ ἀδίκον & τὸ ἀδίκον πρᾶττι distinguuit. Ut igitur neuter bellantium injustè agat, fieri optimè ratione potest. Injustè enim agit nemo, nisi qui scit, se rem injustam agere, atque sic destinato animo injustum agit. Dum autem quis in bona fide est, & rem, quam alter petit, ad se pertinere credit, etsi fortius deinde appareat jus petentis, ipse tamen injustè causam suam fovisse dici nequit. Vid. Hug. Grot. *de jur. bell. & pac. lib. 2. cap. 23. num. 13.* Ita ergo, si quis teneat provinciam cum probabili ignorantia, credens eam suam esse, & alter, qui verus dominus est, eam bello repetat, non minus ille bello eam justè defendere, quam hic vindicare poterit.

LIII. Evenire etiam quandoq; solet, ut justa belligerandi causa evertatur & contaminetur injusto fine & intentione, quando scilicet occasione causæ negocium extenditur ultra limites justæ

vindictæ & restituendi damni illati: nempe ad ampliandum imperium, extirpandum hostem, opprimendos alios, vel etiam hæresim aut cultum impium propagandum. Dum itaque qui bellum indixit, contentus non est tantundem reponere vindictæ, quantum accepit injuriæ, neque id tantum querit, ut pacem hosti extorqueat, justa exinde fit defensio eorum, qui bellum promeriti fuerant, & injusta ejus arma, qui bellum inferre optimo jure poterat. Atque id contingere etiam solet tum, quando qui in alium peccavit, ei quem læsit, boni viri arbitrato satisfactionem offert. Istam enim si acceperare læsus nolit, sed vindictæ cupiditate bellum nihilominus movet, facile hinc conspicitur, bonitatem causæ ab hoc ad illud transire, atque sic justa fieri lædentis, nunc verò se defendentis arma. Hug. Grot. *de jur. bell. & pac. lib. 2. cap. 1. num. ult.* Unde ad stipulanti nequeo Petro Binsfeldio, qui *ad tit. de injur. & damn. dat. cap. 8. conclus. 5.* peccatum quidem committi dicit, quando recta deest intentio, justum tamen esse bellum ex autoritate indicentis, & legitimam causam, nec propter defectum intentionis obligari belligerantem ad restitutionem & reparationem damnorum. Non enim tum peccari contra leges justitiæ specialis, sed contra charitatis præceptum, & hujus transgressionem non inducere obligationem restituendi. Enimverò malè sibi in genere morum opponi justitiam & charitatem, ostendi *disp. de Mohatr. num. 63.* & falsum id est, non teneri ad restitutionem, qui in charitatem delinquit, cum non minus ille injuriam faciat, quam qui adversus justitiam aliquid committit.

LIV. Quod in principe requirimus examen circa belli causas & fines, idem etiam, quanquam non ita accuratum requirimus in subdito ad militiam vocato, imò & alio quovis militiæ nomen daturo. De Vasallo ita decidit Feudista 2. *F. 29. Domino guer-ram faciente alicui, si sciatur, quod justè, aut cum dubitatur, Vasallus eum adjuvare tenetur. Sed cum palam est, quod irrationabiliter eam facit, adjuvet eum ad ejus defensionem: ad offendendum verò alium, non adjuvet, si vult. Sed si eum adjuvare noluerit, non tamen feudum amittit, secundum Obertum de Orto & Gerardum Capagissum. Alii verò sine distinctione dicunt semper debere eum adjuvare. Sed Obertus & Gerardus utuntur eo argumento, quod quem admodum*  
domi-

*dominum excommunicatum, vel à Rege bannitum non est obligatus Vasallus ad adiuvandum, vel servitium ei præstandum, imò solutus est interim sacramento fidelitatis, nisi ab Ecclesiâ vel à Rege fuerit resitutus: ita nec istum injustè gverram alicui facientem.* Statuit igitur Feudista, in bello injusto defensivo, obligatum esse Vasallum domino opem ferre, in offensivo verò injusto bello liberum ei esse, utrum assistere velit, an minùs. Ego nullam hîc facio distinctionem inter Vasallum & alios subditos, utcunqve ille fortè propter beneficium, quod tenet, arctius obligatus domino fuerit, neqve distingvo inter bellum offensivum & defensivum; sed in genere statuo, nulli omninò, neqve subdito neqve extraneo in causa vel sine belli notoriè injusto, sive bellum offensivum fuerit, sive defensivum licere assistere aut opitulari Principi bellum ducturo, sed omnia potiùs tormenta perferre debere, quàm ut scierint coope- retur ad peccatum perpetrandum. Vid. Andr. Gail. *lib. 1. de pac. publ. cap. 4. n. 11. 12. seqq.* Jacobin. de S. Georg. *de feud. § 5. promiserunt num. 8.* ubi disertè dicit, capitulum feudale non convenire juri divino, Petr. Binsfeld. *de injur. & damn. dat. cap. 8. concl. 14.* Ita enim nec servis quidem, qui tamen dominis obtemperare tenentur, ignoscit jus civile, si ad mandatum dominorum commiserint ea, quæ atrocitatem facinoris vel sceleris habent, *l. 157. ff. de R. J. l. 20. ff. de O. & A. l. 2. §. 1. ff. de noxal. act. l. 8. C. ad L. Jul. de vi.* Vicissim, ubi causa justa est, confidenter assero, teneri subditum sub Magistratu heterodoxo militare adversus orthodoxum, quia etiam in orthodoxis vindicari debet, si quid peccatum fuerit in rebus publicis & communem hominum societatem concernentibus. Hülseman. *breviar. c. 20. n. 19.* quò facit *c. quid culpatur 23. q. 1.* Sed id tamen restringunt Doctores ad subditos tantùm, non etiam id permittunt extraneis. Fidelibus enim nolunt concedere, ut militent infidelibus, eosq; in bello quantumvis justo adjuvent, eo casu, quando subjectionis ratione infidelibus non sunt obligati, Matth. Cuno *de pact. lib. 1. c. 22. n. 84.*

LV. Quod si dubium sit, justa causa sit, nec ne, statuit Hugo Grotius *lib. 2. de jur. bell. & pac. c. 26. n. 4.* contra communem, abstinendum tùm esse bello, cò quod qui dubitat contemplativè, debeat judicio activo eligere partem tutiorem. Ego hâc ratione,



non moveor, cum fieri possit, ut aliunde petendum sit fundamentum, propter quod iudicio activo discedendum sit ab iudicio contemplativo. De extraneo quidem concedo, rectius eum facere, si in dubio nomen dare super sedat. Petr. Binsfeld. *de injur. & damn. dat. c. 8. conclus. 12. & 13.* Sed de subdito retineo sententiam communem, recte parere eum principi vocanti & militem conscribenti. Utique enim hic observanda est regula vulgata: tene certum, relinque incertum. Jam verò certum est, inquit Gerhardus *loc. de magistrat. n. 399.* quod subditi obedientiam debeant Magistratui non præcipienti manifestè impia & injusta. Conf. Hülseman. *in brev. cap. 20. num. 14.* Nec multum hic discedit Grotius ab novâ Moralistarum sententiâ, qui per probabilitatis suæ, ut vocant, doctrinam, omnem subditorum vacillare faciunt obedientiam. Ita enim Ferdinandus de Castro Palao *Oper. Moral. part. 1. dis. 2.* Non est controversia, quando daretur opinio probabilis ex parte subditi, quod non teneatur obedire, etiam si contraria sententia sit probabilior. Tunc enim licitum est ex supra dictis amplecti, quæ sibi gratior fuerit. Nec obstat superiore tunc justè præcipere ut tu tenearis obedire, quia non undique justè præcipis, sed probabiliter, ac proinde tu probabiliter solum obligatus eris obedire, & probabiliter deobligatus. Posito hoc fundamentò nullum dabitur præceptum superioris, in quo non aliquam sibi probabilem opinionem fingere posset subditus, si præceptum minus gratum visum fuerit. Alia mens est aliorum Moralistarum, & quidem, quod præsentem materiam concernit, Molina *de just. & jur. quæst. 113.* Filliucci *quæst. moral. tract. 29. cap. 9. q. 7. num. 181.* Boracina *Theol. moral. tom. 2. disp. 2. sect. 1. punct. ult. §. 2. num. 10.* ubi dicit: militibus, qui sunt subditi, principe indicente bellum satis esse, si sciant causam belli non injustam; in dubio enim obediendum esse superiori præcipienti, & in ejus favorem præsumendum esse. Similia habet Joh. de Dicastillo *de just. & jur. lib. 2. tr. 1. disp. 10. dub. 16. §. 6. num. 367.* ubi ait, si subditi pro utràque parte habent rationes probabiles, ac per consequens dubium habent positivum, posse se conformare rationibus superioris &c: Et licet subditus miles non sciat rationes de injustitiâ belli solvere, satius tamen esse suo Principi parere & bonâ fide arma capessere &c: Add. Paul. Laymann. *Theol. moral. l. 2. tr. 3. c. 12. n. 8.*

norm non licuit ita deliberare subditis , num militiam sequi ve-  
 lint an minus. Nemini enim tunc integrum erat militi militiam de-  
 trectare, adeò ut nec veteranorum quidem filii immunes essent,  
 nec propter privilegia parentibus indulta vacare possent, *tot. tit. Cod. Theodos. de fil. militar. appar. & veteran.* Cumq; reperti essent,  
 qui ne militarent, digitos sibi amputarent, Constantinus Imp. cu-  
 rialibus muneribus aggregari eos voluit l. i. *Cod. Theodos. eod.* Idem  
 rescripserunt Imp. Valentinianus & Valens ad Magnum Vica-  
 rium Urbis Romæ l. 4. *C. Theodos. de Tiron.* Sed mox graviores pœ-  
 nas statuerunt iidem Imp. in rescripto ad Viventium P. P. Gallia-  
 rum l. 5. *C. Theodos. eod.* ubi dicunt : *Si quis ad fugienda Sacramenta*  
*militia fuerit inventus truncatione digitorum damnum corporis ex-*  
*pedisse, & ipse flammis ultropicibus concremetur, & dominus ejus, qui*  
*non prohibet, gravi condemnatione feriat.* Durior hæc videtur  
 pœna, sed quæ fortè in Christianos decreta nunquam fuit, quod il-  
 li ex sacro Canone melius edocti non facillè in proprium sævirent  
 corpus. Ante ista tempora autem, & cum nondum fidem Christia-  
 nam amplexi fuerunt Imperatores, graviter jam tùm punitis fuis-  
 se, qui militiam detrectarent, ostendit Arrius Menander l. 4. §. 10. 11. 12.  
*ff. de re militar.* *Gravius, inquit, delictum est, detrectare manus mi-*  
*litie, quàm adpetere, nam qui ad dilectum olim non respondebant,*  
*ut proditores libertatis, in servitutem redigebantur; sed mutato sta-*  
*tu militia recessum à capitis pœnâ est: quia plerumq; voluntario mi-*  
*lite numeri supplentur.* *Qui filium suum subtrahit militia bel-*  
*li tempore, exilio & honorum parte multandus est. si in pace, fustis-*  
*bus cedi jubetur, & requisitus juvenis, vel à patre postea exhibitus,*  
*in deteriorem militiam dandus est, qui enim se sollicitavit ab alio,*  
*veniam non meretur. Eum qui filium debilitavit ( digitis fortè ab-*  
*scissis, aut pollice truncato, quod crebrò fiebat; unde ignavos &*  
*imbelles hodiè poltrones quasi pollice truncos dici putat Claud.*  
*Salmasius de san. trapez. fol. 784.) dilectum per bellum indulto, et in-*  
*habili militie sit, preceptum Divi Trajani deportavit.*

LVII. Possemus hîc digressionem facere, & de istâ quoq;  
 controversiâ, utrum Christiano homini bella gerere liceat, nonni-  
 hil dispicere. Dubitatum enim & disceptatum eâ de re fuit, & olim,  
 & nunc quoque, sed quibus tùm ab Augustino, tùm à Luthero,

Chemnitio, Gerhardo & aliis responsum est plus satis. Conf. Gratian. *canf.* 23. *qv. i. per tot.* Multa igitur hîc dicere planè erit super-  
vacuum. Negocium tamen facescit *Canon XII. Synodi Nicæna*, qvî  
sic habet: *Quicumque vocati per gratiam primum quidem ardorem,*  
*fidem vè suam ostenderunt, & cingulum militiæ deposuerunt, postea*  
*verò, ut canes, ad suum vomitum re versi sunt, ita ut aliqui & pecu-*  
*niam darent & beneficiis militiam repeterent, hi decem annis ja-*  
*ceant, post triennii auditionis tempus &c.* Veteres pleriq; hæc ver-  
ba de iis accipiunt, qvî cingulum, qvò fidei & veræ religionis  
causâ abjecerant, repeterunt, sive in militiam nomen denuò dede-  
runt, eoq; ipso fidem abnegârunt. Fuit enim olim cingulum res  
magni honoris atq; commodi, & propterea Imperatores Ethnici  
persecutionis tempore cingulum militiæ illis, qvî Christiani erant,  
fidemq; negare recusabant, auferre & exauclorare consueverunt.  
Qvam ob causam, cum plures Christianorum militum ardore fidei  
cingulum abjicerent, sine honore potiùs. qvàm fide vivere malen-  
tes, ac demum posteaqvam mundi & honoris tentationibus devi-  
cti essent, idem cingulum, parati deinceps fidem ejurare, vicissim  
ambirent, concilium eis pœnæ Ecclesiasticæ modum imposuit. Vid.  
Francisc. Long. à Coriolan. in *Summ. Concil. ad dict. can.* Sed ista in-  
terpretatio Gabr. Albaspinæo in *not. ad eund. can.* non placet. Ipse i-  
gitur dicta verba intelligit de pœnitentibus, qvî relicta, qvâ professi  
erant, pœnitentiâ & abjecto habitu pœnitentibus solenni, voti sui o-  
bliviscences, rursus animum ad secularia negocia, sive militiam ea,  
sive mercaturam, sive judicandi potestatem, aut qvòdcunq; munus  
seculare concernerent, applicabant. Sed generaliter ita interpreta-  
ri Canonem ab omni ratione alienum dicit Hugo Grotius *de jur.*  
*bell. lib. 1. c. 2. n. ult.* ubi aliam planè substituit interpretationem. No-  
vissimè verò Claudius Salmasius *de fænor. trapezit. p. 782.* verba ca-  
nonis simpliciter accipit de iis, qvî gratiâ inspirante divinâ cingulo  
militiæ deposito, qvò melius & perfectius vitæ institutum magisq;  
Christianum capesserent, postmodum illud resumpserunt, & de-  
nuò se militiæ sacramento obligârunt. Non igitur patres absolute  
damnasæ dicit militiam, nec milites, qvî ex necessitate ei nomen  
dedissent, improbasæ, sed eos non excusasse, imò & pœnâ Ecclesia-  
sticâ dignos judicasse, qvibus cum jam liberû esset non militare, ab



ea utpote jam dimissis ac sacramento solutis, iterum ad eam redire placeret. Et hanc secundam militiam propter solam hominum trucidationem patribus improbatam fuisse. Sed hæc Salmasii explicatio ideò subsistere nequit, quia ipse Imperator Constantinus, quo autore Concilium Nicenum congregatum fuit, lege publicâ liberam dedit optionem illis, qui tempore Licinii honoribus militaribus dejecti fuerant, vel rei militari se reddendi, vel liberè & pro arbitratu vitam degendi, uti refert non Theodoretus tantum, cuius metaphrasten reprehendit Salmasius, sed etiam Eusebius *de vit. Constantin. lib. 2. c. 33.* Si igitur damnata fuit eo tempore militia ab Christianis secundâ vice suscepta, quomodo optionem dare potuit iis Constantinus? Magis igitur erit, ut Hugonis Grotii partes sequamur, & de illis canonem accipiamus, qui in militiam denuò ierunt cum abnegatione fidei jam agnitæ. Quicquid sit, illud apud omnes in confesso est, non damnari hoc Canone simpliciter omnem militiam. Nec ergò licebit ex dubiâ ejus interpretatione certum aliquid adserere, & nudis conjecturis militum conscientiam sollicitare, cum præsertim militiam DEO improbatam fuisse, tantum abest, ut quis dicere queat, ut potius disertè contrarium in Scripturis habeatur, quod tamen hîc examinare nunc nostri non est instituti.

LVIII. Cæterum nullum hodiè vitæ genus est improbius, quàm eorum, qui sine causæ respectu mercede conducti militant. Hug. Grot. *de jur. bell. & pac. lib. 2. c. 24. n. 9.* ubi *num. seq.* dicit, non solum propter prædam militare, peccatum esse, sed etiam propter stipendium, si id unicè aut præcipuè spectetur. Et nihilominus plurimi hodiè spattam suam defendunt ex eo solo, quod non sine stipendio militent. Imò verò multi alii vel eo tantum nomine militiam eligunt, ut sibi liceat esse nequioribus. Hinc igitur, ubi primum strepit tympanum, concurrunt undiq; gulosi, maximi mulierum mœchi, laborum fugientes, purgamenta urbium suarum, & nomina sua in militiam prostentur, non tam hostibus, quàm hospitibus & rusticorum gallinis metuendi, quos profecto satius esset, eò ablegare, ubi curari possint, ne quid deterius eis sit, quàm quibus pessimè est. Et certè periculum est, ne propter sceleratos istiusmodi milites tota causâ intervertatur, & quæ sperari poterat, victoria,

hosti

478.  
hosti cedat, cùm non facere soleat Numen divinum cum exercitu  
variis criminibus contaminato. Petr. Binsfeld *de injur. & damn.*  
*dat. c. 8. concl. 18.* Laudatur hoc in argumento Epistola Aureliani  
Imperatoris, quam ad Vicarium suum scripsit, quamq; refert Fla-  
vius Vopiscus in *Aurel. n. 7.* Si vis tribunus esse, inquit, imò si vis vi-  
vere, manus militum contine. Nemo pullum alienum rapiat, ovem  
nemo contingat, uvam nullus auferat, segetem nemo detrahat, oleum,  
sal, lignum nemo exigit, annonam suam contentus sit. De prædâ hostis,  
non de lacrymis provincialium habeat: arma teresa sint, ferramenta  
samiat, calceamenta fortia. Vestis nova vestem veterem excludat.  
Stipendium in baltheo, non in popinâ habeat. Torquem brachialem  
& anulum apponat: equum saginarium suum defricet, captum  
animal non vendat, mulum centuriatum comiter curet. Alter alteri  
quasi servus obsequatur: à medicis gratis curentur: aruspiciibus ni-  
hil dent: in hospitibus castè se agant: qui litem fecerit, vapulet.

LIX. In modo belli gerendi difficile est servare proportio-  
nem exactam. Cùm enim idè ferè instituatur bellum offensivum,  
aut ut persequamur id, quod nobis abest, aut ut vindictam suma-  
mus ab eo, qui injuriis nos affecit, consequens est, & justitiæ natu-  
rali conveniens, ut finiamus bellum & ab armis desistamus, quan-  
do vel id nobis acquisitum est, quod par fuerit illi, quod nobis de-  
betur, vel quando tantum damni datum fuit, quantum vindictæ  
modum non excedit. Quare, si Galli, inquit Franciscus à Victoriâ  
*de jur. bell. n. 56.* irruentes in Terram Hispanorum, jussu Regis sui  
pagum incendissent, non idè fas erit Hispanis integrum Regnum  
Galliæ occupare; sed solum quatenus justitia & æquitas permittit  
Gallorum illam injuriam vindicare, adductis etiam belli expen-  
sis &c. Sed periculosum tamen est hîc subsistere, & nihil ultra mo-  
liri. Siquidem ille, adversus quem bellum motum fuit, brevi post  
tempore insurget, bellumq; sibi nullâ justâ causâ illatum causabi-  
tur, maximisq; copiis injurias vindicaturus præstò erit. Fiet hæc  
ratione, ut bellum ex bello trahatur & nunquã ad finem perducantur  
controversiæ publicæ. Magis igitur erit, ut continuetur bellum  
etiam post acceptam satisfactionem, donec hostis pacis expetat  
conditiones. Succedit enim in locum pristinæ causæ alia  
nova, quæ est causa periculi vitandi. Hostis namq; nunquam præ-  
sumi-

sumitur animum hostilem deponere, nisi id expressè declaraverit, & poterit is quandocunque vires recipere, easq; denuò experiri. Jam verò potissima Reip. salus in securitate consistit, quæ haberi non potest, quando perpetuo metuendum est ab hoste notorio. Nisi igitur pace factâ bellum finiatur, continuare id satius erit, donec vel planè victus fuerit hostis, ut resurgere nequeat, vel pacem poscat belli ipse pertæsus.

LX. Restat, ut de acquisitione bellicâ aliqua addamus, cum diversa hîc plerumq; Principis aut Reip. & militum singulorum habeatur ratio. Distinctè autem tùm de immobilibus, tùm de mobilibus est respondendum. De immobilibus in scholâ Jctorum ista obtinet sententia, fieri ea non cujusq; privati quocunq; modo agrum aut fundum hostilem ingredientis, sed pertinere ea ad principem aut Remp. cujus nomine bellum geritur. Disertè Pomponius l.20. §.1. ff. de captiv. & postlim. Publicatur, i.e. Reipublicæ acquiritur, ille ager, qui ex hostibus captus est. Et ratio manifesta est; quia enim possessio agri hostibus interverti nequit, nisi ita auferatur, ut omnis penè aditus intercludatur, hoc autem à milite privato fieri non potest, quippe qui tali prohibitioni planè insufficiens est, facilè hinc patet, majores vires requiri ad territorium aliquod occupandum, totumq; hoc negotium ad belli Ducem spectare. Publico igitur hîc actû opus est, inducendus est exercitus, expugnandæ munitiones extructæ, aut extruendæ sunt novæ, præsidia imponenda, nec sufficit nuda insessio, ut ager hosti eripiat, sed imò tanto hîc opus est apparatu, ut non aliq, quàm illi, cujus auspiciis res geritur, territorium illud cedere ipsa dictitet ratio naturalis. Facit, quod res soli amplificent, confirment & dilatent territoria, ut ita intersit principis fines imperii sui constituere, & quousq; patere velit ambitum suæ gubernationis, definire. Joh. Gœddæus ad l.3. §.1. n.14. ff. de V. S. Joh. Herm. Stamm de servit. personal. lib.1. tit.1. c.3. n.6. Occupato autem ita territorio liberum est principi privatis istud per partes assignare dominiis. Sic enim etiam Romani olim agros ex hostibus captos solebant aut totos publicare, aut partiri in victorem populum, aut per censores locare, interdum assignare veteranis, aut certum iis vectigal imponere relictis pristinis dominiis, quò pertinent l.15. §.2. ff. de R. V. l.11. ff. de evict. Add. Petr. Fab.



l.2. *semestr. c. 4.* Gothofred. *ad l. 20. §. 1. ff. de captiv. & postlim.* Nihil crebrius occurrit apud Historicos, quàm stipendium devictis provinciis, quæ idcirco stipendiariæ dictæ, impositum. Vectigales tamen in hoc à stipendiariis seu tributariis differebant, quod vectigales incertum quid solverent, quando scil. agri concesserant certis conditionibus, veluti *ἡ τῇ δεκάτῃ τῶν ἀπογεωργιών: πέμπτῃ δὲ τῶν οὐπεργιών*, uti scribit Appianus Alexandrin. l. 1. *de bell. civil. & Plutarch. in Grach.* At stipendiarii certum quid in pecuniâ vel etiam in frumento pendebant. Vid. Arnold. Vinn. *ad §. 40. in fin. Inst. de R. D.*

LXI. Circa res mobiles non eadem est Doctorum sententia. Aliqui enim capientibus eas acquiri, simpliciter & indistinctè asserunt, uti Cujacius *lib. 19. obs. 17.* Alii capientium quidem eas effici contendunt, debere tamen tradi Duci exercitûs, ut is dividat inter milites juxta cujuslibet dignitatem & merita, uti Jason *ad l. 1. n. 9. ff. de acq. poss.* Franc. Duarenus *tit. de acq. rer. dom. c. 3.* Nicol. Boer. *decis. 178. num. 6.* Didacus Covarruvias *ad c. peccatum de R. J. in 6. pars. 2. §. 11. n. 6.* Alii verò eas illius faciunt, cujus auspiciis bellum geritur, quod prolixè defendit Antonius Merenda *lib. 1. contrav. cap. 22.* Alii, quos sequitur Dominicus Arumæus *exercitat. Justinian. 4 n. 12.* distinguunt inter vulgaria, quæ fieri volunt militis occupantis, & preciosiora, quæ principi populovè, cujus auspiciis belligeratur, attribuunt. Primi distinctè inhærent literæ textuum *in §. 17. Inst. de R. D. l. 5. §. ult. ff. de A. R. D.* Secundi mixturam faciunt juris civilis & canonici, & nituntur inprimis *l. penult. §. simili etiam modo C. de donat. c. dicat aliquis 23. qv. 5. c. jus militare, dist. 1.* Tertia opinio singularis est, & quod sciam, à nemine hæctenus, præterquam ab Merenda propugnata. nititur autem inprimis textibus illis, qui de prædâ agunt, aut bonis hostium jam devictorum. Quarta distinctionem comminiscitur in jure nullibi fundatam, neq; exemplis, nisi paucissimis comprobata. Singula autem hic discutere, nimium foret & præter nostrum institutum.

LXII. Hugo Donellus *l. 4. comm. cap. 21.* non distinguit inter hostium res mobiles & immobiles, sed in genere de omnibus intelligit regulam positam in *d. §. 17. Inst. de R. D.* nempe capientium fieri omnia ea, quæ capiuntur ex hostibus. Discrimen tamen facit ex personâ

sonâ capientium, ita ut quæ privati capiunt ex hostibus, privata sint & singulis acquirantur, quæ Imperator verò & Dux belli capit, publica fiant. Esse autem, ait, quædam quæ nemo ex hostibus capere possit, nisi Princeps aut Resp. Talia esse duo, agrum hostilem & prædam. Illum non nisi devictis aut expulsiis hostibus capi, postquam in potestatem victoris omnia cedant, quæ fuerint hostium. Hanc itidem capi devictis demum hostibus, cum id propriè prædæ nomine veniat, quod devictis hostibus desinat esse hostium. Reliqua mobilia, quæ perseverante adhuc bello & nec dum devictis hostibus capiuntur, pro conditione capientis modò privata fieri, modò publica. Ista Donelli sententia prolixè nunc examinari nequit; duo tamen in rebus mobilibus occurrunt, quæ ulteriori opus habent explicatione. Ecce enim fieri potest, ut in medio conflictu duorum exercituum, à manipulo quodam militum omnia impedimenta hostium capiantur, & in præsidia perducantur, ipsi tamen non vincantur, sed superiores existant; Nunquid igitur res ita captæ hostibus nondum devictis, eorum tantum erunt, qui istas abstulerunt? Imò verò illi potiùs, cujus auspiciis bellum geritur, deberi eas dixero, præsertim cum universitatem quandam bonorum constituent, & talem quidem, quæ ad integrum pertinuit exercitum. Deinde simpliciter considerat Donellus conditionem capientium, & quæ à belli duce capiuntur, indistinctè publica fieri dicit. At hæc ratione deteriorem facit conditionem ducis belli, quàm cuiusq; militis gregarii. Hic enim quod capit, suum facit. At ille quicquid capit, etiam nondum devictis hostibus, totum id publicum facit, nihil suum ex mente Donelli; & tamen tam ille, quàm iste alieno nomine militat. Deficit ergò in Duce belli modus hic acquirendi singularis, quod videtur absurdum, aut saltem iniquum.

LXIII. Plerique, qui hodiè in jure philosophantur, sequuntur Hugonem Grotium, aliter totam rem enucleantem, Distinguit ille *lib. 3. de jur. bell. & pac. c. 6. num. 10. seq.* inter actus verè publicos belli, & inter actus privatos, qui fiunt occasione belli publici. Capi igitur res mobiles aut in ministerio publico, aut extra illud. Si extra ministerium publicum, actum haberi pro privato, & res fieri singulorum capientium, ut si quid milites capiant non in procinctu aut in eo quod facere jubentur, sed in eo, quod promiscuo jure aut

solo permissu faciunt : In ministerio autem & actu publico quæ capiuntur, acquiri populo, aut ei, qui bellum gerit. Sustinere enim tunc singulos personam Reip. ejusque vice fungitur. Prædam autem apud plerasque gentes populi fuisse, sed ejus dispensanda arbitrium Imperatoribus concessum esse, ita tamen, ut rationem actus sui populo deberent. Hinc igitur vel venditam eam fuisse, & pecuniam inde comparatam in ærarium redactam, vel militi concessam, & tunc vel direptione, vel divisione ratione stipendiorum aut meritorum eam in dominium privatorum venisse. Add. Arnold. Vinnius *ad §. 17. Inst. de R. D.* Franzk. *ibid.*

LXIV. Et ita quidem, dicit Grotius, gentibus placuisse, potuisse autem utrumvis constitui, aut ut capta populo bellum gerenti, aut ut cuivis, qui manu caperet, in dominium cederent, posse etiam populum quemque inter suos aliter constituere. Atque ita nunc observari notat Vinnius *d. l.* ut in direptionibus oppidorum & præliis suum quisque faciat, quod coepit : in excursibus vero capta omnia fiant eorum, qui in comitatu sunt, inter ipsos pro dignitatis ratione partienda. Cæterum si nudè rationem naturalem consideremus, non videtur satis commoda distinctio inter actus publicos belli & privatos, aut inter occupationem, quæ fit in ministerio publico, & quæ fit extra illud. Bellum enim quia non potest nisi auctoritate publicâ geri, nec privato quidem ut hosti, bona sua auferre liceat, nisi ut liceat, effecerit auctoritas publica, Quia igitur non tantum auctoritas publica actum talem in genere licitorum ponit, sed etiam hostis ipse publicus est, & ex consensu Reip. actus ille suscipitur, non haberi potest pro merè privato & extra ministerium publicum. Nec est, quod regeas, non esse in ministerio publico, qui procul ab exercitu in liberis & injustis excursibus bona & res hostium capiunt. Nudam enim rationem naturalem si attendas non possunt dici isti excursus esse prorsus extra ministerium publicum. Licitum quippe est civi hostem publicum ubique locorum persequi, occidere, bonis exuere, & modis omnibus divexare, vi consensûs & mandati generalis, ab Rep. dum hostem decernit, dati. Utrum autem id faciat per excursus injustos, dum tamen ne prohibiti sint, an verò justâ acie & conflictu solenni, nihil interest. Utrobique Reip. inservit, utrobique ergo versatur in ministerio publico.



plico. Nec enim licite occideret, aut bona ejus diriperet, nisi hostem eum pronunciaſſet Reſp. Singulis igitur adverſus ſingulos non minus pugnare licet, bello ſemel indiſto, quam integro exercitui acie inſtructâ. Poſtquam a belli gerendi forma in artem redacta eſt, & minus utile viſum fuit excuſiones ejusmodi indiſtinctè admittere, coeperunt illæ arbitrio Imperatoris ſubjici, & non facilè ſine ejus jufſu inſtitui. Quandoquidem igitur, ſi jus naturale ſpectes, nemo ſibi primariò militat, ſed ut Reip. in quâ vivit benè ſit, facilè hinc patet, omnia, quæ ab hoſtibus capiuntur, Reipublicæ fieri, cujus ſcil. in miniſterio ſinguli milites verſantur, & bona hoſtium acquirunt: tantum abeſt, ut hæc faciendâ ſit aliqua diſtinctio.

LXV. Ut tamen alacriores redderentur cives, ut hoſtem fortius & majore vi impeterent, voluerunt gentes, ut quod quisque ceperit, ſive in excuſionibus, ſive in conſictu ſolenni, id ſibi retineret atque acquireret. Atque hinc nata eſt regula, quæ habetur in §. 17. *Inſt. de R. D.* quod ea, quæ ex hoſtibus capimus, jure gentium ſtatim noſtrâ ſiant. Sed inter capientes tamen aliqua ſtatuenda eſt differentia. Quandoque enim capiunt ſinguli, quandoque totus & integer exercitus, & per hunc Reſp. quæ per exercitum repræſentatur. Utrobique capta acquiruntur capientibus. Singulis, quæ capiuntur à ſingulis, toti populo, quæ capiuntur ab exercitu populum repræſentante. Quod enim populus noluit acquirere id, quod à ſingulis capitur, ratio videtur eſſe iſta, quod non ita repræſentatur populus in uno aliquo milite, ſicuti repræſentatur per integrum exercitum; & turpe viſum fuit, populum ſibi vindicare id, quod unus aut alter, cujus dimicatione ſingulari negotium, confici non potuiſſet, ſibi ab hoſte acquiſivit. At aliter ſe res habet in iis, quæ non à ſingulis, ſed ab integro exercitu, qui de ſummâ rei decernavit, occupata ſunt, quæ non decet, ut ſine permiſſione Ducis aut Imperatoris à quibusvis invadentibus diripiantur. Talia ſunt, quæ propriè dicuntur præda, quæ ſcil. fuſo fugatoque exercitu hoſtili poſt certamen occupantur, *ἀδφύρα* Græcis dicta, quibus opponuntur *αὐλά*, ea ſcil. quæ durante certamine hoſti eripiuntur. *Grot. de jur. bell. & pac. lib. 3. cap. 6. num. 24.* Et hæc diſtinctione obſervatâ pleraque; facilè explicari poſſunt autorum teſtimonia; quæ dicto capite §. 14. ſeqq. fruſtrâ in eum finem collegit *Grot.*

229.  
tius, ut probaret, non acquiri singulis, quæ miles in actu bellico & ministerio publico capit, sed toti populo & Reipublicæ. Non enim sequitur, Duces prædam & spolia hostium inter milites dividebant. Ergo milites singuli ea, quæ ab hostibus capiunt, non acquirunt. Add. Goëdd. *ad l. 3. §. 1. num. 12. 13. ff. de V. S.* Andr. Gerhard. *dec. 4. quæst. 5.*

LXVI. Quamquam verò nemo sit, qui neget, occupationem bellicam esse modum acquirendi dominii, & hunc quidem ab omnibus gentibus semper probatum fuisse, acerrimè tamen sæpè, & inprimis patrum memoriâ disputatum fuit, quando res ab hostibus capta verè dici possit acquisita, præsertim cum fieri possit, ut post exiguum temporis spacium res capta ab altero recuperetur, & hosti iterum eripiatur. Justinianus Imperator cum Cajo ICo ita rem definit, ea quæ ex hostibus capimus, jure gentium *statim* nostra fieri *l. 5. in fin. ff. de A. R. D. & §. 17. Inst. de R. D.* Sed id nihil morati Balthasar Ayala *de bell. jur. cap. 5.* Albericus Gentilis *l. 1. advocat. Hispan. cap. 2.* & Hugo Grot. *l. 3. de jur. bell. cap. 6. §. 3.* tùm demum, acquisitas jure belli res mobiles contendunt, quando intra fines, id est, præsidia hostium perductæ fuerint. Et in hanc rem adducunt textus in *l. 19. §. 3. l. 5. §. 1. l. fin. ff. de captiv. & postlim. revers.* sed meo judicio non satis consideratè. Etenim textus illi omnes de hominibus aut de animantibus, quæ ire redire possunt, ut est equus & eqva freni patiens, mulus clitellarius &c: quibus scil. postliminium est, *l. 2. ff. eod.* intelligi debent. At tales non sunt res hostium alix, quæ in prædâ sunt & postliminio non redeunt, *l. 28. ff. eod.* Nec verum est, quod vult Grotius, eandem esse rationem hominis & rei in hoc gentium jure. In homine enim capto præsumitur animus revertendi & ab hostibus se subducendi, quem non deposuisse creditur priùs, quàm intra præsidia hostium fuerit. Tùm enim incipit desperari reditus. At talis animus in rebus aliis non extat. Et violenta est explicatio Grotii, quando *d. §. 17. Inst. de R. D.* intelligi vult cum conditione continuandæ pòssessionis, donec res in præsidia deducta fuerit. Tota enim acquisitio bellica perficitur per capionem sive apprehensionem, quæ facto momentaneo absolvitur. Et hoc est, quod dicit Justinianus, bello capta *statim* fieri capientis. Quod autem statim sit, omnem excludit temporis fractum,

tractum, aut alium actum novum, sive ut Grotius loquitur, continuationem possessionis. Neque istud satis cohæret, quod vult Grotius, eodem modo rem amitti, quo post liminio reddit. Utique enim physicè impossibile est, ut rediisse dicatur, quod nondum est intra præsidia nostra aut sociorum, quanquam recuperari etiam extra ea queat, de quo tamen casu dicti textus non agunt; sed physicè impossibile non est, ut amittatur res, antequam in hostium præsidia deducta fuerit. Et quod civis manet, qui captus est, antequam in præsidia hostium perducatur, id magis ex jure civili Romanorum est, quam ex jure gentium, quod nudum capionis factum respicit. Romani autem in gratiam civium suorum multa constituere potuerunt, præter jus gentium, sed quæ propterea aliis gentibus nec regulam nec modum præscribere debuerunt.

LXVII. Cæterum constituerunt inter se gentes aliquæ in Europâ, ut in mari naves & res aliæ captæ tum demum acquisitæ capiētibz censeantur, ubi per horas viginti quatuor in eorum potestate fuerint. Grot. *d. l. Noviore* tamen edicto Ordines Confœderatarum provinciarum, ei, qui navem ab hostibus occupatam recuperat, ejusdem navis & bonorum, quæ in ea sunt, bellum indistinctè addixerunt nullo habito respectu temporis, quo navis in hostium potestate fuerit, dum tamen intra præsidia hostium perducta nondum fuit. Sim. à Grænewegen *de LL. abrog. in Holland. ad l. 2. ff. de captiv.*

LXIX. Circa agros rectè se habet sententia Grotii, non statim captos intelligi illos, simul atque infessi fuerint, sed tum demum, si mansuris munitionibus ita includantur, ut nisi iis expugnatis parti alteri palàm aditus non sit. Nec enim aliter capio, sive occupatio aut apprehensio agrorum fieri aut perfici potest. De possessione tamen, quâ ratione pristino possessori intervertatur, memini ex facto quæsitum fuisse. Et jura quidem Romanorum civilia cecidisse eum possessione suâ dicunt, qui non vult in fundum reverti, quod vim majorem vereatur *l. 7. ff. de acq. vel am. poss. l. 3. §. 8. l. 18. in f. l. 25. in f. ff. eod.* Verum si res ex principiis suis seposito jure civili examinetur, non videtur dejectus possessionem suam omnimodò amisisse, nisi tota & integra provincia ita occupata sit ab hostibus, ut nulla ejus recuperandæ spes super-



fit illis, qui *ad xpo* tenent. Quamdiu autem hæc superest, etiam privatis id proficuum erit. Quia enim per exercitus causa publica agitur, & de summâ rei disceptatur, nolim ego hic fundi privati possessionem & ejus vel acquisitionem vel amissionem aliter, quàm ex ipsorum principum gestis æstimare. Tum scilicet fundi privati sequuntur territorium, ejusque conditionem. Nec enim propterea, quod propter adventantem exercitum cesserim fundo meo, & in illum militibus jam referum reverti nolim, possessionem me amisisse censebor. Quid enim si exercitus ille ipseus Reip. fuerit, cujus ego sum civis, & ego tantum metu petulantia militaris inde decesserim? Quid si exercitus etiam hostilis animo non perpetuo ibi subsistendi, nec possessionem occupandi, sed transeundi tantum, aut ad tempus commorandi, aut nocendi solum Reip. fundum meum ingressus fuerit. Utrique non privatum me illico possessione meâ crediderim, quandoquidem nec fundi quidem mei causâ exercitus advenit, sed Reip. ut bellum inferat, & territorium occupet. Quo occupato non nego, fundi mei eandem esse calamitatem & fortunam. Sed quia nec tunc quidem, cum integra jam occupata est provincia, possessionem princeps illico amisit, quamdiu scilicet ille animum revertendi & hostes expellendi gerit, nec suspicatur, repelli se posse ab hostibus illic commorantibus, quod etiam ita inter privatos obtinet per *l. 25. in f. ff. de acq. vel am. poss.* utique tunc nec ego quidem me fundi mei possessionem amisisse censebor, ut maximè ego intrare eundem verear. Quod si expulsi deinceps atque ejecti fuerint hostes, quia possessio territorii ex parte Reip. nunquam adhuc interversa dici potest, nec mihi quidem novâ opus erit possessionis apprehensione. Nec obstat, quod longius temporis spacium intercesserit, quo ego exclusus fui, quia hoc æstimari debet ex actibus Reip. qui ut rectè gerantur, longiorem temporis tractum requirunt.

LXIX. De effectibus occupationis bellicæ breviter noto, tribuere eam plenû & absolutû dominiû, in rebus quidè mobilib<sup>9</sup> perpetuû & irrevocabile, in reb<sup>9</sup> a. imobilib<sup>9</sup> eatenus, quatenus occupans in possessione permanferit. In his n. postliminiû esse voluerunt Romani, *l. 20. §. 1. ff. de capriv.* quemadmodû etiam in illis rebus, quæ singularè in bello usum habent, ut sunt naves longæ atq; onerariæ, muli

clitèl-

clitellarii, equi & equæ freni patientes *l. 2. ff. eod.* quanquam circa  
 naves hodiè apud plerasq; gentes diversum obtineat, adèd ut captâ  
 navi per hostes, & eâ per triduum retentâ, teneri asscuratores, de-  
 cisum olim fuerit per Rotam Genuens. *decis. 101.* non obstante, quod  
 post triduum navis recuperata fuerit. Similiter etiam in homi-  
 nibus & servis, postliminium constituerunt Romani *l. 12. §. 9. l. ult. ff.*  
*de captiv.* Extra hæc, reliqua mobilia omnia nullo postliminii  
 jure consebantur, sed in præda erant *l. 28. ff. eod.* Consequitur hinc,  
 non esse satis tutum tertium possessorem, qui agrum ab hoste sibi  
 comparavit, propter jus scil. postliminii, quod in suspenso est, & cui  
 præscribi durante eo bello nullatenus potest. Vicissim verò, quâ  
 rem mobilem, quæ in prædâ est, ab hoste emit, omni securitate  
 gaudere, nec posse eam rem ullo modo à pristino domino repeti  
 aut vindicari, nequidem si intra præsidia suæ civitatis ab ipso con-  
 cive aut vicino suo reducta fuerit. Et hinc facere nequeo cum Si-  
 gismundo Sindelfhaus / qui *observatione 56.* defendere conatur,  
 dominum pristinum rem ab hostibus sibi ablatam & Titio vendi-  
 tam etiam absque precii refusione reposcere valere. Omnino e-  
 nim hic facienda est distinctio hostium & latronum, quia illi rem  
 occupando suam faciunt, hi non faciunt, Vid. Franzk. *lib. 2. resolut.*  
*9.* neque pro latrociniiis habendæ sunt excursiones, quas fa-  
 ciunt milites in solo hostili, cum etiam singulis perse-  
 qui hostem suum, illiusque bona occu-  
 pare liceat.

F I N I S.



28.  
JUSTINIANI Jura, quæ referta sunt Moralium,  
Et Illa, curas PRINCIPUM, queis temperantur Publica  
Qui cum labore & ritè discit, evehetur laudibus,  
Spartamq; lætus indeptus per omnia ornabit bene.

JOACHIMUS Nerger D.  
& Prof. Pandect. Publ.

---

*Ad Praeximum ac Literatissimum*  
Dn. FRIDERICUM ZÖRLERUM,  
Haynâ Misnicum,  
*cum de JURE BELLI feliciter & eruditè*  
*publicè disputaret,*  
Amicum sibi faventissimum.

Gentes bella movent, & EPISCOPUS ipse fatigat  
Ordine relictò BATAVOS & Fœdere nexos,  
Arbiter ipse Deus subito dabit his quoque finem!  
Præstant his BELLIS, Sapientum PRÆLIA docta,  
De BELLIS inter placidamque piamq; quietem.

amoris & benevolentiae testandæ  
ergo scr. gratulab.

WERNER THEODORUS MARTINI  
J. U. D. Prof. Pand. Pub. Seren. Elect. Saxon.  
à Consil. Appellat. & Jurid. Facul-  
tat. p. r. Decan.

---

Hactenus assiduò tractasti pollice libros;  
Scriptorum juris lectio grata fuit.  
Tanti sed studii dum publica munera promissis,  
Gratulor & cœptis prospera quæq; precor.

MICHAEL FRIDERICUS LEDERERUS  
U. J. D. & P. P.



**D**ucere prudenter bellum, est heroica virtus,  
sapius & fortis præmia digna capit.  
Musarum in castris (testor) Zö R L E R & fuisti  
Fortis : Te meritò clara trophæa manent.

Amico & Domestico suo singulari  
hiscæ gratul.

CASPARUS LYSER D.  
Fac. Jurid. Asses.

---

**I**ngeniosa tuæ laudo certamina Musæ,  
Quæ Majestatis jura suprema docent  
Dignum opus est virtute tuâ per maxima niti,  
vera ex difficili gloria Marte venit.  
Hâc insiste via, Zörlere, & certa Laborum  
Præmia cultori, mox dabit alma Themis.

Eruditissimo Domino Respondenti, Ami-  
co singulari gratulab:  
scrib:

JULIUS Ernst Schrödter D.  
Fac. Jurid. Assessor.

---

**I**gnavos animos delectant vilis quævis:  
In genium solers ardua semper amat.  
Tu, Majestatis nunc jura exponis, Amice,  
Res est ingenio & digna labore Tuo.  
Gratulor & toto fundo nunc pectore vota:  
Inde Tibi & Patria commoda mille fluant.

Fautori & Amico suo integerrimo  
prospera quæque appre-  
cans f.

M. GODOFREDUS Strauß  
H 3 Non

720.  
Non solet in tenebris temerè torpescere virtus,  
Ejus sed nitidum prodit ubique jubar.  
Sic, ZÖRLERE! Tuum quoque virtus impulit ardens  
Ingenium, ut faciat publica verba probe!  
Gratulor hinc meritò, Tibi prospera mille precatus,  
Si perges, studiis præmia certa manent

BURCHARDUS RETTBERG  
L. L. Stud.

---

Tristis Lex statuit, *pœnam vel morte luendam,*  
*Qui fera bella ferit, quivè duella movet.*  
Nec, ZÖRLERE, tamen Belli de Jure loquacem  
*Esse, nec excire sponte duella, times?*  
Non adeò: Tibi quin deberi præmia censes:  
*Censeo ego tecum: Spe possidere tuâ.*  
Mox eris, ut factum Princeps probet, atq; repensent  
*Patria, Sparta, Themis bella Duella Rei.*

In gratiam CLmi Dn. Respond. Comi-  
mentalis & Amici sui  
scrib.

Gottfriedt Wagner *Jur. Stud.*  
& *Elect. Quæsturæ Wittenb. Alia-*  
*rius Judic.*

---

Qui THEMIDI solers operam, ZÖRLERE, navasti,  
In præsens vires exeris ingenii.  
Applaudunt omnes; resonat: FELICITER! ipse  
Gratulor, & cedant prospera cuncta precor.

GODOFREDUS FRIDERICUS Meuser  
Dresdâ Mûsicus

*Que*

**Q**ue circa Bellum cuius sint Digna notatu  
 Præcipue, ex thesibus discimus hisce tuis;  
**Q**uas dum conatu satagus, ZÖRLERE, fueri  
 Egregio, merito FAUSTITER! addo meum.

Pauca hæc prolixiori tamen animi affectu  
 Certissimo suo Amico gratula-  
 bundus scripsit

DITTERICUS Schile  
 Eq. Misn.

**I**us MAJESTATIS dum doctè exponis, Amice,  
 Gratulor ac pariter prospera mille precor,

*Pauca hæc  
 ad Clar. Dn. Responsurum cumultuante  
 salamo dabat*

J. C. Strauß.

**M**Arte reportatur crudeli gloria magna:  
 Gloria sed major Juris ab Arte venit.  
 Hinc, ZÖRLERE, sacri Juris penetralia mente  
 Securâ interea discutis atque teris.  
 Gratulor ex animo; nec enim Tibi præmia de erunt,  
 Cum fies patrii lumen honosque soli.

*In honorem Clarissimi Domini Respon-  
 dentis Fautoris atq; Amici pluri-  
 mum bonerandi paucula  
 hæc apponebat*

JOHANNES Gottfried Hillemeier.  
 Dnm



72  
Dum fremebunda replet belli Bellona tumultu  
Omnia, Tu Martis publica jura doces.  
Materia est, ZòRLERE, tuo dignissima captu,  
Hinc Tibi pro meritis gloria multa datur.  
Perge bonis avibus, voveo, sic perge suaves  
De studiis fructus carpere mille tuos.

Hæc pauca gratulabundus Fautori, Amico ac  
commensali suo per quam hone-  
rando appone-  
bat

ENGELBERTUS à Burge  
Lips. Misn.

